

鐵嶺縣志卷十九

藝文志



文武以政傳管晏以功傳孔孟以道傳鄭馬以經術傳程朱以理學傳  
班馬韓柳以文章傳後漢之諸葛北宋之司馬以文章與功業並傳士  
君子生當盛世得志當時珥筆彤庭和聲鳴盛文章勳業彪炳千秋誠  
人生快心事也迺遭時不遇境與願違既不能爲華國之文章又不能  
作濟時之霖雨世無知己抱膝長吟屈子之離騷少陵之秋興或因事  
寓意寄託遙深或觸物留題別抒懷抱亦士君子獨善之義也鐵嶺地  
接草萊俗鮮文化自郝公謫居講學者衆輾轉遞遭以至今日鄉賢流  
寓著作題吟手澤心傳未覩雪泥之迹編殘簡斷難尋故紙之堆剝蝕  
散失搜集維艱或得之故老流傳難徵文獻或求之私家藏襲如覓遺  
珠謹析爲文詩二集依年代之先後錄之志藝文



鐵嶺縣志卷十九

藝文

銀州重修圓通寺記

明大陳循泰和學士

佛教入中國自漢以來然矣上自公卿士夫下逮黎庶罔不尊禮之以其能作禍福報稱善惡謂此生之貧富貴賤壽夭皆夙生所爲理不必有徵然足以化愚使之畏禍嚮福不謂無功至於陰翌皇祚其用歸於永長悠久如陰陽寒暑晝夜往來循環無窮始終無盡以是而致其愛君祝國之誠則士大夫固宜崇之所謂見有禮於其君者事之如孝子之養父母也是以琳宮梵刹所在皆然夫豈無由哉國朝洪武二十三年始成銀州之城置鐵嶺衛舊有刹在城西北隅歲久頽廢宣德三年

鐵嶺縣志

卷十九 藝文

二

鐵嶺縣立第一工科印

指揮施興始因其舊垣而宮之名圓通寺正統三年都指揮使康福指揮李俊張忞繼修葺之景泰之初今指揮使孫環偕指揮同知王斌復增新之至天順初祠佛棲僧之具凡所宜有者咸備克稱祝釐之所旣成孫王二公偕住持僧圓全來謁求爲記遂如右天順六年九月勅放歸田七十八翁芳洲居士廬陵陳循德遵甫記

重修圓通寺碑記

明高崇文

夫佛所從來遠矣興於漢傳於唐而尤莫勝於我朝明興垂三百年兩都人士及天下郡國無論一二好修小民奉佛尊經者不乏即搢紳大夫勳庸世胄之家靡不潔奉侈祀惟佛教之爲兢兢蓋其道原分吾儒之餘派而獲國佑民皆是法耳談者不得其說至抗而與之角又以奉



佛之心毀佛尊經之心叛經舛亦甚矣吾郡先民當洪武初建圓通寺於城迤西構正殿五楹立佛像三尊東列伽藍西列祖師而前列有四天王一時廟貌森儼佛光炳耀蓋犖然具矣浸淫至正統年間稍補葺而猶未修也迄於今而棟宇朽敗殿舍傾頽佛像塵蒙金身露處有識者莫不憫然而竟不能爲出一力以光大之乃甯遠伯李輕財好施暨弟原任統兵李成材共興善念遂約善人陶德明及境內助緣士夫若千人共襄厥事或出資或出粟或出物料各有差計畧刻工歷五年而功始落成焉俾廟貌重新神光再照纖毫皆李氏力也佛量無私得鑿之蒼蒼而報之冥冥者乎余雅不言佛然躬遇慈舉則擊節嘆曰此亦足以彰盛美而表鄉閭者也於是爲文以揚李氏之美用垂不朽以勵

鐵嶺縣志

卷十九 藝文

三

鐵嶺縣立第一工科印

世風云萬歷二十三年太學生高崇文撰

銀州重建三官廟記

萬歷十年賜進士奉政大夫總理遼東糧儲兼理屯種戶部郎中

趙惟卿

柏鄉人

天生地成六一合而水用具此三官命名之原也如道藏等經所載姓氏龍女及三元下察之說荒謬難詰然賜福解厄等語與祀典禦災捍患之意合故廟貌徧寰宇至今血食未艾也鐵嶺古銀州地成化丁巳建廟於城北之柴河祀必用渡父老苦之質諸堪輿家以乾河厥土攸宜顧時詘無當其事者嘉靖壬戌太保寧遠李公初視衛篆即欲建如前議時兵戈倥偬僅仍舊貫湫隘雨注半入浸沒積歲漸頽圯矣萬曆丁卯公提兵北征過而增喟謂不足妥神明肅禋祀也乃大捐俸金付致仕參戎宿君名仰辰者總其事宿君雅有重望復倡鄉耆之趨義者



增庫爲隆拓隘就爽東西廣十丈南北袤二十二丈台增八尺有奇周圍以磚鱗砌中建神殿三間稍前建拜亭三間左右廊六間又前過庭三間鐘鼓樓各一座兩旁俱啓角門以尊中也復建住房三間俾司香者掌啓閉闕其規制揖如拱秩如序凡簷牙疊澀丹堊塗濩成輝煌錯彩巍然標勝槩矣嗚呼天地純淑之氣融結於山川者恒有待而興銀州稱雄於遼千百蘊奇抱秀乃儲精於寧遠公無論勳業輝赫爲名將第一即此廟阨阨二百餘年亦藉公而顯明昌熾豈偶然哉大約純淑之氣鍾於神則爲威靈爲感應以食報於一方鍾於人則爲豪傑爲英雄以垂芳於萬禩故通三才之說者可以悉三元之情狀矣公重厥役乃以廟狀示趙子趙子既紀大略如前復爲迎送神辭三章俾致祀者

鐵嶺縣志

卷十九 藝文

四

鐵嶺縣立第一工科印

歌以侑觴

辭曰靈運蜨兮雲中森水林水林兮龍宮橫九垓兮極日望夫君兮焉窮窳紫壇兮桂陳隩桂椒兮蕙肴充

右迎神

揚玉袍兮拊鼓壯瑤篴兮鈎鐘靈偃蹇兮夷猶亘天路兮駕飛龍役百靈兮橫地軸輳靈類兮賸從并欣欣兮姣服謦將澹兮紛來同

右降神

靈皇皇兮旣留炎高舉兮雲旒若雨暘兮盪氛褻奠厥居兮田疇道百川兮不波福無極兮銀州

右送神



重修關帝廟碑

媯川賈弘文

本縣知縣

惟帝大節正氣垂之竹帛昭於萬古薄海內外咸尊崇敬事之故廟貌徧寰宇千百年來血食未已也鐵嶺古銀州地先是土人即廢基設廟西門外規制陜隘康熙癸卯歲王公之綱孫公梗倡鄉耆之趨義者共捐已貲卜地於城之中央東西廣九丈南北袤三十丈令宏敞也中建大殿三間妥神居也綵繪棟宇彰事跡美瞻仰也外聯拜庭三間使深邃肅趨踰也左右各建樓一座懸鐘鼓也前建大門馬殿獻樓三間旁啓角間尊中路也時至禋祀獻戲以侑神也後建廊房六間俾司香者供灑掃事啓閉也規制巍麗錯彩煥然稱勝概矣嗚呼以帝之威靈赫赫在天固不以是爲隆汚而人心樂赴有不能已者但時詘財匱歷十

鐵嶺縣志

卷十九 藝文

五

鐵嶺縣立第一工科印

有餘載始克告竣嗣是保境佑民鞏皇圖於萬禩者端在乎斯矣若踵事增華尙有異於後之人云是爲記

鐵嶺縣舊志原敘

賈弘文

敘曰萬物法天天法道道法自然自然者何也不知其所以然而爲之者也古今之故誠莫違於時矣太初沕穆垓比無垠兩儀旣立三才配焉忽而一畫而斷之連之而重之而再重之二老六子正位於其中而萬事萬物遂無不本於此也喁于吹萬即爲鐘呂之先飲血茹毛已開珍齊之始書契聿興而墳典丘索諸子百家不可紀極矣世代緬邈黃農虞夏之事猶約略可稽則史之爲也史即志也虞書君臣告勅都兪一堂因事陳辭炳焉與星日同朗此即唐虞之志也夏書即夏志商書



即殷志周書即周志也孔子刪書而終秦誓所謂其或繼周百世可知者已露一端矣蕭何爲漢功第一以入秦先得丞相御史律令圖書藏之漢王所以具知天下阨塞戶口多寡強弱之處以何具得秦圖書故也魏晉以還皆以蘭臺石室之藏攬集成書遂代各有史孔子因魯史以成春秋筆則筆削則削游夏不能贊一辭而揆以天理民彝之正亦猶之乎不知其所以然而爲之者也余未受簡命之先已奉有旨令直省府州縣各修志書數年矣蒞任以後府檄頻催而苦無以應今歲秋冬之際乃與紳士之隸籍茲土者謀所以終其事首建置謂邑立而後諸務興也次疆域謂畫域而理官司之守也國家賞賚祿予士馬兵甲之費胥於賦入取給焉故田賦次之戶口又即次之學校則此地所無

鐵嶺縣志

卷十九 藝文

六

鐵嶺縣立第一工科印

然事之大者不可後故學校次之官師相代失得之故即在衆多之口堯湯水旱聖帝明王弗免焉其有事於此卓然有所樹立皆高山之仰也世無傳人而有傳文文傳而人亦傳故次官師次祥異次人物而以藝文終大款九而細目二十有九纂輯率出董子蒐採校正諸紳士咸與有力余借手以觀其成耳嗟乎余於此則不能無感矣直省皆有舊志可依雖今昔異宜不過數十年事耳鐵嶺有志或亦開闢來所未聞乎令不辭固陋勉綴成編所見所聞所傳聞一邑之事大略盡此聖天子欲以周知天下之故衣裳萬國傳示來茲者此則一編亦備天廚一鬻未可少也志即史也總以時至事起不知其所以然而爲之者耳唐人倉頡廟詩云空階有鳥跡猶是造書時吾且溟然其際矣



原跋

董國祥

直隸冀州人

易曰斲木爲耜揉木爲耒耒耜之利以教天下取諸益此萬世衣食之原也周家以農事開國卜世三十卜年八百故邇風邇雅邇頌所詳皆農事焉國家念豐芑重地設立郡縣招集人民墾田殖穀所以爲根本計至深遠矣即鐵嶺居民云屯堡云台所云衝者皆昔時望烽燧謹斥堠之地麻麥幪幪瓜瓞嗒嗒其氣象爲何如哉孔子曰夏禮吾能言之杞不足徵也殷禮吾能言之宋不足徵也無徵不信吾舍周奚適哉故作春秋繫正月於王繫王於春所謂本天道以治人事大一統之義也春秋之義兼事辭道法而有之天王狩於河陽法即道也春秋未修曰雨星不及地尺而復旣修曰星實如雨辭即事也前代之事若存若亡

鐵嶺縣志

卷十九 藝文

七

鐵嶺縣立第一工科印

縣設未久鮮可紀者賈公之爲此志或據事以徵實或因言以立教忠君愛國之意娓娓溢於辭端觀光揚烈彜叙萬年於吾夫子從周之志實無媿焉寧止一邑之事云爾哉

六經對

左懋泰

山東萊陽人

六經非聖人爲之天地爲之也亦非天地爲之人心爲之也易始於陰陽書始陰陽之奇偶詩始於陰陽之清濁春秋始於陰陽之推筴禮始於陰陽之往來樂始於陰陽之調鬯故經一而已而列之爲六天地之晰其數聖人之詳其教而人心之用始盡也然易首三皇書首五帝詩首三王春秋首五霸故易以象春書以象夏詩以象秋春秋以象冬而禮樂無專屬古有六代之禮亦有六代之樂先儒言六經之道同歸而



禮樂之用爲急聖人教人四府易詩書春秋而禮樂污隆其間蓋四經者聖人立教之體而禮樂治世之用不可不察也易曰上天下澤履君子以辨上下定民志又曰雷出地奮豫先王以作樂殷薦上帝以配祖考此易之禮樂也書曰夙夜惟寅直哉惟清又曰八音克諧鳳凰來儀此書之禮樂也試曰奉璋峨峨髦士攸宜又曰於論鐘鼓於樂辟雍此詩之禮樂也春秋曰天王狩於河陽又曰初獻六羽此春秋之禮樂也夫明於禮樂之原易最尙矣書詳於四代詩詳於成周禮樂之升降在焉而春秋亡於禮者之禮亡於樂者之樂也故聖人教世之心切而於春秋爲獨深豈得已哉孔子以雅頌得所爲樂正韓宣子見魯易象春秋謂周禮在是明此知禮樂之在四經而四經治世之書正以禮樂爲

人用之也世儒言六經在世如日中天今四經具有全書獨禮樂爲不備蓋經世之道體有方而用無窮四經者聖人已陳之數而禮樂萬世通變於不窮神而明之存乎其人耳禮樂莫備於成周儀禮周禮二書皆出周公今讀儀禮十七篇雖亡缺有間而所載冠昏燕射聘食喪祭諸儀於君臣朋友男女死生之文曲折盡變天地微渺之極禮記雜出漢儒亦大抵七十子之徒若高堂孟卿后蒼之倫所傳聞先聖緒論禮家精微之旨咸在則聖人之禮經亦未嘗亡也周禮大司樂一篇漢竇公嘗獨獻之所載天神地祇人鬼教學賓燕軍射飲腊考於天地四方陰陽之聲想見聖人作樂之意劉向得古樂書二十三篇今樂記乃斷取其十一篇雖后夔復起論樂於君臣父子要不外是則聖人之樂經



未嘗亡也禮樂之蘊究於學士大夫而極建於天子觀其統會以知指歸觀其致用以知隆污雍雍在宮肅肅在廟言履爲禮行樂爲樂在易曰元在書曰中在詩曰思無邪在春秋曰大居正聖賢言樂必本於禮而聖學傳心無如學庸二書其原皆載於禮記乃知樂之歸於禮而禮之原於道也易詩書春秋具存而古禮樂不盡傳亦曰待後王之用之耳善乎漢劉向之言曰禮以養人爲本今世無皋陶之法而有司請更定至於禮樂則曰不敢是敢於殺人而不敢於養人也王者治定制禮功成作樂於易得中孚之九二於書得洪範之次六於詩得國風之二南於春秋得於蒲之胥命禮行於豆觴樂通於擊壤本於一人之性情而行爲天下之風俗雖唐虞三代之盛何以加焉

鐵嶺縣志

卷十九 藝文

九

鐵嶺縣立第一工科印

前屯衛佛寺碑

萊海左懋泰

衆生見佛如日衆生自見以見佛如月日之在天和煦於春炎熙於夏晶熒於秋凜冽於冬日無異也人自漸於氣化所處之候與地不同而若異焉然亦習之而不知其關且切也惟沉陰積潦風雨溼霖經旬累月穀敗屋覆饑饉飄飆之不免始祈望杲日爲身家存亡之寄故衆生之見佛如之月受日以光其光常滿與日相對則望相距則弦相合則晦月無異也自人視之或見其面或見其側或見其背而若異焉然亦日聽消長而恬不省察惟晦朔之後昏黑如漆忽生線痕於坤庚之地若魂魄滌迴死而復甦見則心動以爲光明孤露之一線故衆生之自見以見佛如之醫閭遼海當乾坤鼎革天造雷雨之會富貴貧賤經歷



氣數聚散流浪空花孽果毫不自定若金在冶若土在型一聽造物之  
埏鑄舉數世積累平生繫戀天盡奪之而歸於烏有衆生從身家起念  
皆思旋不可常守之物以呼天呼父母之誠心而望冥佑之大力故衆  
生之信佛力未有如此方者則所謂積陰之日也身家既易生死念眞  
斷蓬浮梗霜摧雪掃或樸遯塵存或枝葉轉敷存而憶亡盛而思衰創  
者有深痛而倖者驚後災衆生從性命起念者多能悟不堪久住之因  
以夢中知夢之幻而動修省之心故衆生之近佛心亦未有如此方者  
則所謂朔初之月也前屯衛舊有佛寺兵火丘墟因成頽廢比丘某持  
緣募化而遠近感應施者如鶩鳩工重造莊嚴一新誠佛力之宏亦此  
方人心之所至也大來居士見聞隨喜而說偈言

鐵嶺縣志

卷十九 藝文

十

鐵嶺縣立第一工科印

衆生見佛如見日春陽秋景無得失沈陰冥晦爽厥常始欲拂雲抱日  
出衆生自見如見月光明常在原無缺月之向背人不知生明一線驚  
奇絕日月於人何分別無所分別即日月但願常見如不見朝朝夜夜  
生佛國

送劉心周歸中州序

郝浴

吾道值周顯王三十三年乙酉有鄒國孟子與首嚴義利之辨覺諸侯  
距楊墨暨本朝世祖皇帝順治十六年己亥輒千九百九十五年矣於  
漢武帝建元元年辛丑有廣川董仲舒以道爲適治之路而窮其原於  
天人三策以歆帝衷暨今己亥亦千七百九十九年於平帝元始五年  
乙丑有蜀郡楊子雲慮世趨日惑至辱其身不死作太玄法言以至理



詔後世暨今已亥亦千六百五十五年於隋高祖仁壽二年癸亥有龍門王仲淹投太平十二策不錄退修盡性知命之教於河汾暨今已亥亦千百十七年於唐憲宗元和十四年已亥有南陽韓退之諫迎佛骨手挾孟子之學憤發所向以蹴踏二氏暨今已亥亦八百四十一年於宋神宗熙寧二年已酉有河南程明道咫尺天顏獻正心窒欲之方及哲宗元祐元年丙寅又有程伊川啓沃經筵復請延天下道德之士兩賢以居敬窮理爲斯世斯人開入德造道之門暨今已亥亦五百九十二年于光宗紹熙五年甲寅有新安朱仲晦侍講煥章建極道民力整乾綱常提撕此心如日之升至今已亥亦四百六十六年於元世祖至元十七年有河內許仲平以祭酒歸家一惟致知力行躬牖學徒暨今

鐵嶺縣志

卷十九 藝文

十一

鐵嶺縣立第一工科印

已亥亦三百八十年於明英宗天順元年丁丑有河汾薛德溫總裁天下會試以復性正學爲準至謂五經四書一性字括盡暨今已亥亦二百三年於武宗正德十三年戊寅有餘姚王伯安智擒逆藩而其學即以良知爲宗暨今已亥亦百四十二年浴俯仰二千年中赫赫名公卿崇至尊以福天下何慮九牛之尾而至謂修明吾孔子所傳大學之道粗不雜於五霸七雄精不詭於百家二氏將使人心人理爛然犁然歸於大中至正而無一絲之或悖則數君子之功雖與日月爭光可也然斯傳一墜動至數千百年不得值大量者脫鍵撤鑰而升其堂其傳卒以不緒故天下愛而悲之曰絕學順治已亥陳留劉心周謫鐵嶺卓然若有志於數君子之爲者異哉浴察其苦心極力周五寒暑不退竊壯



其志而病其質至今上康熙二年癸卯得比例西歸浴立喜其有澹然之日矣夫中州奧區也山川人物明秀萬方今一旦縱居其中請得力雪舊抱日與二三學子登崇陽泛洛水嘲風弄月更得騎太行而摩函谷左顧伊川右睨橫渠有一日焉見此中浩浩瀚瀚晶晶瑩瑩若大海之飛濤捲雪而輒復一鏡萬里也然後揭廬於百泉蘇門之上危坐其中以究數君子之用心吾兄其有入乎

附復陽先生自記

鐵嶺古銀州也浴甲午九月謫奉天戊戌五月下嶺卜築於南門之右方十許畝中爲書室三間前有圃種蔬後有園種花左壁吾臥室也右壁一帶皆吾友連屋而居也屋中造瓦床一丈風月之夕吾友畢來盡

鐵嶺縣志

卷十九 藝文

十二

鐵嶺縣立第一工科印

登床跌坐牀下鑽火烹茶漉酒縱談名理至夜分不散架插天下古今圖書恣吾友展玩有化人來則焚香晤對參驗竺乘屋後一岡隱然龍臥所謂銀岡者也雨後登之見郭外羣山紫翠交寫其北山綿亘西繞而東山迄邇南屬簇擁萬狀中控一背是爲鐵嶺然總維吾一線之銀岡殆物之有鼻祖者乎記吾岡下所種桃李皆數度開花而成實矣所舉二三犬子亦哀然冠而似丈夫矣吾歸之歲歲德在卯西牕北有杏一株發花數十椹如蠟撚白梅香色雙絕而花枝婉轉皆回頸視西是皆不足記獨念吾霜天雪夜一燈炳照大靜之餘徹四壁於環海晤群聖於斯須截然有覺心目爲澹於戲非吾銀岡吾安得有此一日也非吾自尊吾安得有此銀岡之一日也泣撫銀岡留爲書院有踵至吾銀



岡而默識浴一日之旨者浴即近侍於數十年遠侍於千百世心皎然如一日也是爲記

銀岡書院記

董國祥

銀岡書院者侍御郝復陽先生謫書室也先生按蜀時劉文秀爲孽先生鼓勵人心繕垣固圉有定傾之功世祖皇帝給欽賞先生弗受曰分也比回道考核乃以簿書微瑕鐫職二級先生故忤於藩會五中堂合薦而藩釁成矣先生以少年居此不甘寂寞乃於居室之旁結茆三間圓戶亮榻顏之以丹後植山果十餘本築台於中略有園林之致先生雖被竄逐不自暇逸時取古人之書手自編摩繼乃一意研易於六十四卦各爲圖參伍盡變思竟其所以然如是者二十有二年至康熙乙

鐵嶺縣志

卷十九 藝文

十三

鐵嶺縣立第一工科印

卯上乃廉其寃以原職召還於其將歸額書室之戶外曰銀岡書院其致知格物之堂則先生原額也董子以無事漫遊其地乃屬塾師呼諸弟子之受書其中者而語之曰汝輩朝夕於斯亦知先生所以名堂之意乎知者心之靈也致者推而極之以求其無蔽也朱子即物窮理之說象山已有同異姚江則更非之余以爲猶方隅之見耳如天下國家身心意皆物也誠正修齊以至治平即格物也五倫之內君亦物也爲臣盡忠即格物也親亦物也爲子者盡孝即格物也以至夫婦昆弟朋友莫不皆然記言之曰其爲物不貳夫天地可以物言而况屬在五倫者乎此與所謂知善知惡是良知爲善去惡是格物者又何纖介之疑乎繇是言之不第朱與陸同姚江與朱陸亦無不同放之南海北海亦



無不同蓋此心此理莫有外焉者矣諸士習業於此毋自鄙薄當思所以爲忠臣爲孝子爲悌弟良友修齊誠正之事皆務實踐而體之即治國平天下無其事而有其具庶無負先生所以名堂之意哉先生名浴字復陽別號雪海順治己丑進士鎮之中山人

新建鐵嶺縣關帝廟祝文

代作

郝浴

康熙五年丙午通邑人敬謁帝疏所以崇祀之詳惟治舊祀帝於西郭徒存數楹一時遷謫諸公疑其不稱將改祀於城帝悅而以策示焉來朝大求向方有爽塏在震直衝巽離之交登而得其位夫震龍之所升也入之以巽開之以離變化旣行風從火出其理之善動而大有者乎自是佐領有印縣治有侯而徙官有召祈年則有秋射策則有人市利

鐵嶺縣志

卷十九 藝文

十四

鐵嶺縣立第一工科印

饒民生遂謂非浩氣所發而帝力闢焉則誰爲之者獨是某等實首其事而深懼弗集因襄以耆民重以當路普以大衆自辛丑來晨昏駢力旣久始繩木陶瓦而棟隆又久始和土範金而像生及今旭日再中諸善士醮漿於樽爇香於爐聲聞競競而神來矣俯念趨事之早若彼而報功之遲若此因知徒手莫之能前而拚誠終以不退在某當癸卯亦切慮心力難齊廢然中懈曾懈橐金五十獨肖帝於舊祠之中以別伸下願不謂大力群心卒得以展帝之威而成人之善遂某等區區始事之念以有今日是皆鐵嶺上下住寄如山之錫也爲像中極建帝日角龍顏凝旒秉圭二侍四陪皆以五彩彰施森然拱列莫不慈威暢悅謹於丙午十月初四日洞啓光明庶通國之人得以再瞻天表而如電之



日不啻復見吾徒也夫古之名公鉅卿神而上舉者多矣其在吾帝造世之功不以入神而不奮希道之心不以通天而不發故遞進以至於無窮而天下後世翕然宗之豈其高步九天反屑屑於一祠之建而洞觀四海曾詹詹於於一獻之誠乎蓋人心所在天理爲昭神爽所憑君恩用極亦正以帝一生所爲盡天下人分內之所當爲帝千秋所就皆天下人意中之所欲就其群然義趨如歸實在此而不在彼耳至某所以像帝必內極其慎外極其嚴固寸誠所不敢爽亦所以曲暢通國官紳士民心悅誠服之至意也耳目一新天人交慶惟帝大公惟帝至察其於斯土斯民將永錫之福而大造以庥乎

鐵嶺異燕記

郝浴

鐵嶺縣志

卷十九 藝文

十五

鐵嶺縣立第一工料印

愚謫藩僑於南郭有故入鐵嶺鐵嶺者舊永寧伯家也得茅屋三間暑蟄焉堂有燕子巢二一當吾門其燕則羽修而語具僕曰此巧者也一當吾榻數患不潔其燕則影肖翹而飛決捨僕曰此拙者也遲一日矢痕斑斑然僕請攫之愚不可曰聞燕子來自烏衣國遠不知幾萬里委蛇而托處此將主人我也今一旦破所孕字吾見其難爲再日榻淋浸甚僕請益力愚善喻得已然終慮吾僕羸人也倘重愛吾榻而輕其巢伺吾出怒敗之悔無及矣爲覓一捲肯綮而上擊奈捲敝甚矢篩篩下猶無捲也愚笑曰終汚吾榻終不若嗔僕亦笑唯而兩燕都悄然遲之翦翦脫身去竟三日無所遺每翔於堂右之空見其憑虛綽約若有事疑而就視則矢已纍纍其下矣自是往詣遺矢積久不失尺寸愚不覺



喟然曰巧耶拙耶有心如此人何以堪夫勢既不至於中變而氣益和非羽族之至善其孰能與於斯乎燕乎請爲我舞我爲爾歌歌曰燕尾  
熾熾兮柴水之涓入我草堂兮不隨不規胡自灑濯兮遂肅肅而傾葵  
爾語爾輩兮知乃公爲誰乃公作歌兮天風四吹

紫荷白筠說

郝浴

辛亥七夕於葛山之陽著孟子不得其解登紫閣窺金書憶銀州春日  
速鸞有自名紫荷白筠者憑鸞而語夫蓮出泥竹破土其色紫白伊其  
時虛下而能通兩抱君子之德非紅酣翠老盛滿於後天者之所能髣  
髴也殆根育生理者乎其言雅警浴每操聖賢之說以辨物而紫荷白  
筠曰動謂我是聖賢恐當下墮落難救藥矣終謂吾儒無預彼說紫荷

鐵嶺縣志

卷十九 藝文

十六

鐵嶺縣立第一工科印

白筠曰亦不可太作標榜時同謫諸子偶及修贖笑應之曰築通天之  
臺不如弄一丸泥也來且七次味其言有否泰而無吉凶浴固問其誰  
遲遲曰吾老矣而六子相爭苦心莫喻庶蟬吸西風蚌含秋月差得其  
似耳既罷思之蟬洞其殼於上蚌洞其殼於下二口兩屬六子純陽非  
朗吟洞庭之人乎今夕何夕鵲駕銀河之期也青山如黛金風薦爽安  
得紫荷白筠翩翩雲表步虛而下與之究孟夫子浩然充天之旨乎因  
著葛山思賦曰爾乃明抱珠以遁世把玉露而遊仙蘇丸軸地黍珠吞  
天若其龍行霜版種臥星泉底淇園之睿極聖胡之鮮井收玉女而香  
柔鳳儀嶰谷而聲圓妙擒斯旨理或有然往者艷錫一丸之紫橫點八  
著之白紅樓三級青甃一席變化飛昇不違咫尺呼吸九有那其形迹



已矣乎翠岳參差丹房蕭索忽對此龍門之湖天風之柏上清之雲籬  
煖谷之畫壁鳳池月浸桃園春碧椒實紅而雲根香精熟而密脾赤玉  
虹跨天外之銀河丹泉酌杯中之琥珀幽人上心不可擺畫恨浩浩以  
無從徒日月之飛白將浪跡於十洲寧蹈空之雙鳥羗摩雲而屢探亦  
洪崖之肆拍已醉薰風還著遊屐庶髣髴之一來或驀然而有獲

龍門天風  
上清煖谷

鳳池桃源摩雲紅崖玉虹丹泉皆山中名勝

### 重修銀岡書院記

內閣學士  
奉天府丞黃叔琳崑山

國家定鼎之初鉅公名德應運而起其研究理學久益精純而公忠直  
亮之節始終如一者尤推郝公復陽先生至今海內學者頌說稱道無  
異辭焉公登順治六年進士釋褐爲諫官言論丰采侃侃有古大臣風

### 鐵嶺縣志

卷十九 藝文

十七

鐵嶺縣立第一工科印

巡按四川會小醜未平公設策破賊全蜀底定時逆藩方爲大帥微露  
跋扈雜署武職爲監司盛其爪牙以戕民命公指名劾去之又密言悍  
帥驕橫狀愈觸其怒乃誣公冒功冀置死地賴世宗章皇帝鑒公忠直  
從寬謫戍公以十一年甲午九月謫奉天越五年戊戌徙鐵嶺愛銀岡  
名勝卜地結廬顏曰致知格物之堂寢食誦讀其中益殫成已成物之  
學比鄰諸生十餘人願從公游公欣然接之口講指畫昕夕靡倦處嚴  
霜急雪之區而弄月吟風不改其樂康熙十三年逆藩果阻兵以叛明  
年廷臣訟公先幾之見疏請復用猶格於部議蒙皇上特旨賜復列台  
諫公瀕行手記歲月留所居爲士子讀書處此銀岡書院所由名也當  
是時鐵嶺尙未建學即奉先師木主於其中上丁之祭禮如膠庠諸生



以時課業其堂厥後學宮既設而學院亦漸就傾圮四十九年庚寅鐵  
邑令焦君葺理舊基而傾者復圮者修桓墉榱桷規制加宏又四年甲  
午公之仲子今副憲中美先生出尹陪都益爲式廓距公謫戍之時越  
六十年於茲矣剝復循環之理豈不信而有徵也哉副憲作尹之前叔  
琳曾爲少尹董視學政日擊焦令修復書院之勤須臾落成瓣香肅拜  
於堂儼然如見公口講指畫顛沛不違時茲以麗牲之碑見囑固辭不  
獲因三復公所自爲記指求志意以諭來者亦學者之責也而且嘗謂  
生材者天成材者君雷霆雨露皆天教也爵祿遺逐皆君恩也當逆藩  
逞威怙寵之日其請殺我易於一反覆掌而世祖章皇帝僅以謫戍示  
薄罰其鑒公憂時體國之心欲長養而成就之者意有在矣而公亦曲

鐵嶺縣志

卷十九 藝文

十八

鐵嶺縣立第一工科印

體上意愈思以講學明理者蓄直方剛大之氣視古之羈臣放士無聊  
不平而招魂問天者豈不百倍逾之哉伊川先生之謫於涪也與篋叟  
醬翁論易不倦考亭先生之以僞學禁也尊聞行知學子有千里到門  
者未嘗拒而不納也蓋聖賢身處憂患惟學問之力足以勝之不惟勝  
之而已且從容涵泳以磨礱其圭角韜斂其光晶皆在於是方公之按  
蜀抗疏也非卓有道力者孰能爲之而積之以二十二年之久故其學  
之益粹且純宜也即其後視巖於淮開府於粵綱紀嚴明惠閭旁洽淮  
粵之人至今尸祝之夫孰謂非銀岡之所得力者歟公之大節具載國  
史其餘風遺澤士大夫亦皆能道之固不假此一方一字而傳而惟是  
一代正人君子所誦讀師法之地曾百代下猶可以廉頑立懦况當吾



世而蒸嘗享祀其可缺諸又願後之官此土者敝則葺之毀則新之以傳永世而勿替也公諱浴字冰滌一字雪海直隸定州人舉順治己丑進士至廣西巡撫都御史卒於官其曩時從游銀岡諸生左暉生左所生左昭生左曉生左昉生左喆生左準人皆前明吏部稽勛司郎中左公懋泰之子若姪原籍山東萊陽人戴遵先戴巡先戴盛先皆前湖廣參政道戴公國士之子原籍江西新昌人皆捐貲助修書院者其具呈請釐地基則諸生徐元弼力居多例得附書康熙丙申七月九日

### 重修銀岡書院記

府尹屠沂

復陽郝中丞留謫居時所築室爲書院公之自記備矣重修者誰邑令焦君釐正之宋令光大之也余維天下之書院多矣惟嵩陽白鹿嶽麓

### 鐵嶺縣志

卷十九 藝文

十九

鐵嶺縣立第一工科印

石鼓四書院以大稱豈高閣周建長廊四起云爾哉蓋大其人故大其書院也余讀公之文章想公之行事而有以識公矣公學探理窟才蔚國華嶽嶽懷方不移不屈前後歷任政績昭然而直言敢諫則呂獻可之先見范景仁之勇決殆又兼之矣顧公崎嶇龍塞二十餘年讀書深造味道之腴有大過人者觀公之自記非眞聞道者而能言之乎後人登公之堂因依手澤有能識公之旨證公之心或聞風興起薰其德而善良鄒魯文物近在海隅以成聖天子壽考作人之化則是公大造於是邦也茲鐵嶺片石即與嵩陽白鹿嶽麓石鼓四大書院而五焉奚不可也夫興行教化守土之責也表彰前哲後學之事也今余忝京兆後又與司空中美君爲同垣友於公爲子姪行故因宋令之修復書院爲



文以記之宋令者誰江西鄉進士一驥也有善政與邑廣文何師曾者共襄斯舉則其人可知矣

### 銀岡書院題壁

奉天府尹郝林中美定州

先君子以順治甲午謫奉天戊戌至鐵嶺康熙乙卯始奉召還朝即其居為書院時鐵嶺無學宮因祀至聖先師於此迨學宮成而書院廢舊址遂湮不孝林懼其久而無傳也乃屬邑令焦君於學宮之側勒石以記之使後賢有所考焉時康熙四十九年庚寅四月望日也吏科掌印給事中不孝男林盟手謹識

### 跋銀岡書院題壁

知縣焦獻猷廷謨陝西

銀岡創立書院迺原廣西復陽郝大中丞之遺愛也公於奉命還朝日

### 鐵嶺縣志

卷十九 藝文

二十

鐵嶺縣立第一工科印

留居以為書院蓋欲倡明理學啓迪後賢意至隆澤至溥也時邑之文廟未建先師位無所厝恒借以妥至聖申祀典者蓋有年矣康熙戊寅邑令許志進率眾捐建文廣請主入殿緣是學宮成而書院漸廢基址淪沒鞠為茂草旗丁因而佔住焉余於庚寅春銓選鐵嶺入吏科書憑謁大都諫今陞大納言中丞公之仲君中美先生因授余前記以清釐書院為屬余識心於夙夜不忘方蒞任即具詳各憲幾費籌畫越兩載至壬辰夏始經盛京戶部暨奉天府尹兩衙門斷出原有房地余又勉捐薄俸紳衿亦樂助已貲兼購旗丁新置側舍三楹隙地一塊並為書院癸丑夏旗丁移出他所始得整理修葺敬懸匾聯使十五年湮沒之區廓然於舊雖中美孝思所格實中丞公遺澤有靈也謹勒始末用垂



永久凡我後來君子知留傳之盛與清釐之難當踵事增華勿致仍成頽廢則於先賢開創之意後學造就之基所裨非淺鮮也康熙五十二年中秋鐵嶺縣知縣三秦焦獻猷謹跋

鐵嶺縣學記

康熙三十八年

提督學政

屠粹忠

今天子膺歷御宇三十餘年聲教遐迄武功共濯海隅絕漠之域人齒受生淪浴膏澤罔弗尊親乃益偃武修文崇尚儒術日與在庭名彥講求政體命禮部廣取士選拔其尤引見郡邑親民之吏品其賢否用昭激勸慎選大僚以端其表率所以長育人倫而興起德化者意良厚也戊寅冬十月車駕巡幸奉天念留都首善之地吏課宜擇京兆尹而教士之責專在學臣乃以蓋牟王公爲大京兆而提督學政則以命余余

鐵嶺縣志

卷十九 藝文

二十一

鐵嶺縣立第一工科印

既視事垂一年奉天屬邑曰鐵嶺人文稱最其邑令則淮陽許君念中也許君起家進士政治卓有能聲余每褒而異之一日以親建儒學碑記請問其地則城東隅購若干畝其形則龍山聳秀麟瀆環流其規制則殿宇宏敞門垣備具其經費則許君所捐俸倡始紳士協力勦事其時日則始乙卯夏迄秋而成君信勤於其職哉夫吏道之敝如黠賈居奇贏焉方其一官人手其心思計畫汲汲身家利祿之是圖舍此而外不暇及也即有廟貌峨峨宮墻粲粲春秋釋奠不鞠茂草足矣而許君所樹若此其度越詎不相遠耶昔余爲封邱令時河決未復城沒於水久矣余度地形繕陶甃不踰年而城成百方招徠飛鴻爰集當事者以爲能由是上名大府備位諫垣今許君宰彈丸之邑撫鳩鳥之民養育



訓誨近成樂國凡有設義塾置倉廩興廢振絕民不勞而事舉大京兆尹嘉之上其名吏部行且當膺內擢其所獲不亦豐歟君又工詩賦嫻文章天子巡狩之日仿班馬賦體作奉京賦數千言率諸生爲東巡詩歌頌德功優詔嘉獎用錫宴賄其所以鼓吹風雅黼黻太平者將來更何如也顧余謂學校之興行不惟其近惟其久許君之所爲有足多矣使鐵邑人士果皆束脩砥行以無負譽髦之選鐵邑之令果皆修明政教以仰副作人之意余於斯能無厚望哉奉宣朝廷之德意以率先長吏錄長吏之勤以訓飭多士風示來者余之職也於其請也書以應之

剛毅輔國公大爾差碑文

康熙十年御製

自古帝王創業垂統以貽萬世凡屬宗支皆膺顯號以重懿親也爾大

鐵嶺縣志

卷十九 藝文

二十二

鐵嶺縣立第一工科印

爾差係諡壯勇巴圖魯穆爾哈齊之子性行純良才猷練敏已封爲剛毅輔國公奄逝既久豐碑未樹朕篤念宗親爰稽成憲勒之貞珉用垂不朽庶昭朕敦睦之懷云爾

通議大夫萬涵金公神道碑銘

內閣學士張玉書素存  
諡文貞江南

國家受命七十餘載文教誕敷武功赫濯中外臣鄰罔不恪共砥礪以贊郵治而豐鎬望族累葉濟美者尤光炳史冊知奉天府尹萬涵金公其最著者也公以門蔭入仕歷官有聲凡八遷而至工部侍郎及罷誤左官又四遷而爲京兆尹去京者甫一載遭疾而卒余爲學士時曾與公同官知公爲深公子瀚等將葬公鐵嶺之陽以附先兆持狀乞銘於余余不敢以不敏辭公諱世鑑字萬涵其先世臨濠有官於遼者遂占



籍鐵嶺祖玉和當太祖高皇帝龍飛之際攀附鱗鳳仕至禮部尙書授一等阿思哈尼哈番世襲豐功偉烈具在國史祖母宿氏周氏封一品夫人父維城仕至兵部左侍郎兼副都統母李氏封一品夫人繼母郎氏封一品夫人侍郎有子六人公居第五少秉粹姿卓犖不羣旣長好讀書諸子百家無不博覽尤精於天官家言康熙六年授刑部他赤哈哈番持論斷事迴越於衆以是顯名十年遷通政司知事十二年典銓者知公才特請於朝遷文選司員外郎銓政釐舉十六年出權天津關稅事竣吏抱牘進曰此額外羨餘也公喟然曰國家設關雖云抑末然商賈困憊已極司權者不能利民而忍自利耶悉以歸度支十七年五月遷刑部郎中閱一載嶽無冤民而朝廷稔聞公權關之政以公才宜

### 鐵嶺縣志

卷十九 藝文

二十三

鐵嶺縣立第一工科印

居要職遂權河南道監察御史會地震公條上五事具言陰陽災沴由人事怨鬱於下而後天變感應於上今大小臣工不可謂不上負朝廷下負生靈矣仰請乾斷勸善懲惡以弭天變十九年上以內閣官屬職司文翰召諸曹郎試滿漢文學於廷公得優獎授內閣侍讀學士二十一年七月遷學士禮部侍郎公外若木訥而遇事陳奏辦理晰微深中竅繁上時顧而頷之十一月纂修太宗文皇帝實錄成加俸一級十二月授戶部右侍郎是時海氛雖靖而遷界之禁未弛民多失業二十二年有詔分遣大臣巡歷海疆察其地之可以遷民者悉與展復舊界公階副都統史雅公赴江浙同地方大吏徧閱沿海形勢因嘆海濱遺黎凋瘵日甚假使結桴而漁亦何至冒禁綱而顧令坐困若是遂奏復溫



台寧三郡界外民田九千餘頃隨田七萬四千七百畝有奇要害地應設防者仍分兵戍守其餘一切奏罷以省冗食自是棄田盡墾營制亦復民生安堵僉以爲子孫百世之利二十三年以管理牽連被議左遷光祿寺少卿久之轉大理寺丞太僕寺少卿二十七年四月擢奉天府府尹十月遇覃恩授通議大夫留都旗民雜處習尙漸澆公至察利弊咨疾苦勤撫循嚴教誠不鈎距而奸無不聞不市惠而恩無不渥而歲之內都人戴之如慈父母顧勞苦積鬱結轆於中忽食次疾作竟不起康熙二十八年五月二十六日也距生順治四年十一月初一日享年謹四十有三公生平以氣節自許不肯詭隨徇俗每大廷集議意有不合輒用兩議上請事主以誠交友以信接物以謙御下以禮雖忌者亦

鐵嶺縣志

卷十九 藝文

二十四

鐵嶺縣立第一工科印

傾心折服而持已廉潔尤出天性尹京兆時一屬吏有舊其鄉產茶親費以餽公溫語慰謝之固請終不受其人嘆息而去比卒家無餘儲不能具含歛戚友咸悲感致賻而遼之士民奔走號泣如喪私親所在醵錢設像爭爲祠以祀公嗚呼使天不靳以年俾得竟其用其所設施當益焜耀而竟止於此是可悼也元配張氏總督福建兵部尙書諱朝璘女繼白氏總督三省兵部尙書諱秉貞女俱贈淑人又娶某氏兵部掌印郎中諱卜書庫女封淑人子二長瀚次純女一適廣東雷廉道僉事蘭公諱一元子候補筆帖式梓銘曰

閩山峨峨遼水湯湯篤生碩哲實爲國光崇論閎議在廷侃侃惟義是非或舒或卷爲民請命有害必除苟利於物違恤乃軀無負于國無忝



所生爲清白吏克保令名惟遼之左枌榆舊壤公之來也膏澤是仰惠則露濡威則霜肅公之逝也言歸不復窀穸其魄箕尾其神松楸蒼蔚百世如新

郝公祠碑記

知縣 盧 銓

郝雪海先生銀岡學院其原額爲致知格物之堂先生講學於斯聖經八條目中特揭明善之要以垂訓非舉此而遺彼也自記云大靜之餘徹四壁於環海晤群聖於斯須截然有覺心目爲豁先生名堂之意其即孟子聖由於知之義濂溪先生明通公溥之旨乎所以示學者積矣歲壬子<sup>銓</sup>承乏茲邑詣書院展拜先生祠前後棟宇翼然祠之右以居守祠者求所謂致知格物之堂無有也<sup>銓</sup>以官廨毀於火僦民房非便

鐵嶺縣志

卷十九 藝文

二十五

鐵嶺縣立第一工科印

就書院內左隙地構茅屋數椽校薄書其中侯衙署工竣日以此爲諸生絃誦地遷寓不一月而<sup>銓</sup>以罪被效待讞之後靡二載有餘招生徒數人講舉子業焉其於致知格物之學不相徑庭乎然而結茅講學先生之遺澤有不可使斯堂泯泯者而今歲夏五<sup>銓</sup>將南旋拜辭先生之祠而去爰記數言以致愧慕之思知都人士講肄斯地必有聞風興起覺先生之所覺以仰副先生近待數十年遠待千百世之有心者乾隆元年歲丙辰五月後學盧銓識

請除苗弩毒藥疏

雲貴 高其倬

竊貴州調濟事宜已就臣愚昧之見會商具奏外更有一事雖屬甚微然與苗情亦有關係查諸苗之中種苗之弩最毒恃此拒捕雖皆伏於



箐內所離頗遠中人不深無如其藥極毒纔破皮肉即難救治從前督撫亦曾設法收各苗之努以除此害而深山窮野之弩究難盡收臣近訪得苗弩藥有二種一種係草藥一種係蛇藥草藥雖毒熬成兩三月之後即洩氣不靈蛇藥熬數年可用然單用蛇汁其毒止能潰爛仍有治蛇之藥可醫更有一種蠻藥其名曰撒以此配入蛇汁敷煎其毒遍處週流殆不可治聞此撒藥係毒樹之汁滴在石上凝結而成其色微紅產於廣西泗城土府其樹頗少得之亦難彼處蠻人暗地賣入其價如金苗人以爲至寶臣非敢欲借此卸過於鄰省但既知有此不敢不思杜絕之計伏乞密諭廣西諸臣查訪如果有此樹請令認明形狀盡行伐掘再既有此藥恐亦有能治之方亦令訪求臣現今亦在雲貴兩

鐵嶺縣志

卷十九 藝文

二十六

鐵嶺縣立第一工科印

省內捐賞遍尋解毒之術若毒弩可解亦治各省苗蠻之一端也

請墾馬廠地畝疏

高其倬

竊查雲南一省山多田少生齒日繁所產之米有收之年止敷食用是以滇省米價較鄰省倍貴而省城米價又較外府獨昂省城之人較他處度日爲艱而省城之兵承平日久人口日增且無生理較商民口食又窘臣到滇以來時時留心思爲設法調濟近經詳細訪查有臣衙門及後營馬廠一處坐落陸涼州地方原甚寬大因其地草毒馬食之多死故三十餘年馬匹不往牧放附近居民將地可種者俱漸報糧開墾惟剩中間積水成湖之地一片又水旁窪下難種之地共計三千三百餘畝可以種麥種稻即招本地人民願種者薄取田租令其承種但今



年已過種麥之期止有稻田可種計秋收時可得米一千石至來年即稻麥俱收該地百姓見田租甚輕紛紛來說此地中心積水之處因大河泛濫年年灌注所以耕種不得若於上流立閘兩旁築隄二道旱時放閘灌田澇時閉閘令水順隄而下則水不灌入田皆涸出起初一二年種麥以後漸可擇種稻田其閘工官建隄工則百姓願自出力但涸出之後乞將此田分給築隄百姓承種納租民得田種兵得租食實屬兩便如此料理雖中心深潭一時難乾而四旁涸出者定可得田一萬餘畝臣又委員踏看與所說相符隨支鹽規銀一千五百兩分發該知州吏目等令其修築閘座百姓亦共築隄工八月內即可完全此時地已有涸出者其勢可以成功若再得此田成就則一年可約得麥米一

鐵嶺縣志

卷十九 藝文

二十七

鐵嶺縣立第一工科印

萬數千石倘二年有收則可有二三萬石之租設有歉歲省城八營之兵不動公儲即可接濟若更年久并可貯作義倉接濟百姓再此田若成恐易有欺隱侵漁之弊容臣再具疏題明造冊送部查攷庶可永遠有裨又臣思他處恐尚有似此者若查出開墾或濟兵民或益賦稅均爲有益再行料理一面奏聞

倉穀平糶疏

雍正四年

閩浙總督高其倬

竊臣細看福建情形福泉漳汀四府產米不敷民食泉漳更甚每年至二月三月平糶不能不行米穀一節最爲福省第一緊要之事而歷年以來平糶之中積有二大病以致官廩日虛刁風日熾此二病不除難言充實倉儲接濟民食其一則從前各官交盤之弊不清其所授受皆



有價無穀而所作之價又係不敷買補之價雖有不肯收受之員加以  
上司之抑捺衆口之調停即不得不收是以日漸空虛竟無彌補臣見  
在徹底清盤務必懲革此弊容臣查清另行具奏其一則年年平糶之  
價太賤即舉福州一府而言歷年即極豐之歲最賤之米價未有買至  
一兩一石者向時督撫但討目前百姓之稱揚不顧將來買補之無法  
平糶之米每石價減至一兩且有不及一兩止賣九錢者此雖米價極  
賤之時所不能有之價下屬奉批收存此價欲買之本處則本處無一  
兩及九錢之米可買欲買之外省外省雖有一兩及九錢之米可買其  
各項運脚從何而出是以屬官之中亦有尙欲籌補者緣價短難買惟  
付之束手無策聽其空虛待受參處耳而中間因糶價太賤更生一大

弊端姦民豪棍乘此謀利得米到手輾轉即有倍贏雖設法愈密而其  
術愈巧竟視平糶爲奇貨往往借米價略貴即鼓煽窮民恐嚇官府壓  
之以官應愛民之說迫之以人情洶洶之勢相沿既久其意竟欲平糶  
之期一歲早似一歲平糶之價一年賤似一年所以從前有糶價太賤  
且在一年內即行平糶者不知此不過米價稍貴非飢荒可比米價稍  
貴乃遂如此若實遇荒年將何以處若不極力挽回則福省之倉儲惟  
日空虛民食終不能接濟臣之愚見如福州府來年平糶視米之程分  
高下每石定以一兩二錢或一兩三錢穀亦視其程分高下每石定以  
六錢五分或六錢其各倉之穀亦有在倉年久及當日收倉之時程分  
即低者再隨宜酌定至於各外府州縣亦隨其地平時米之貴賤定價



總之必計算本地秋成後既平之價爲準務使既糶之後仍可於本處或他省買運還倉乃可源源接濟不至一發不繼但愚民止顧目前不計久遠止知目前得賤價之米之好不知將來無接濟之米之苦必以爲臣不如從前督撫之愛民加以閩俗浮薄刁棍復多而紳衿之多事者又從而合之恐有扞格騰謗之事但臣爲地方長久之計初行若少畏難流弊何所底止然臣亦不敢孟浪從事已詳細熟計豫期多方曉諭使各紳士軍民皆知臣之此意是爲百姓計慮久遠即使價稍有餘總仍添買穀米以濟閩民並無一自爲之私而以堅定持之自然信從可行再閩省情勢倉儲豐歉民間纖悉皆知米穀多餘則人情安定辦理曉諭一切易行所有江南之穀久蒙聖恩諭運但早則更爲有益伏乞聖恩再令江南早趁北風多時發運不必拘定二十萬石隨得隨發則趁風速到若少遲南風一多恐難行走不能刻期至閩臣謹一併奏懇聖恩仰祈睿鑒

晉省官鹽滯銷私鹽充斥請照舊章歸官運疏

監察御史 鄧慶麟 香閣

竊維山西亢旱成災闔境錢糧蒙恩概予蠲緩地方維正惟賴鹽課爲一大宗而山西各州縣辦理鹽務未能劃一有暢銷之區亦有滯銷之區因有私鹽充斥而官鹽予以滯銷亦有領運官鹽夾帶餘私過多妨礙正鹽以致引鹽不能暢銷此其弊在地方官招商辦運不得其人故也查山西運鹽舊章向歸官運官銷以濟民食蓋鹽歸官運則價酌其平必不肯與民爭利致滋事端而額引有定地方官自慮考成萬不肯



任私塩充斥致正引銷不足額此官運官銷裕國便民之最善也無如各州縣履任後因政務殷煩勢難兼顧往往招商領運官則坐擁虛名盡由商人把持舞弊而鹽政于以大壞緣辦運之商非地方刁紳劣鹽即市儈奸商湊集資本夥謀朋充勾結鹽場各官聯爲一氣漁利分肥弊端不勝枚舉其成運正塩每引三萬斤應加餘鹽三千斤以爲銷耗之費此定章也而塩商舞弊弄手眼每引加帶餘塩七八斤不止正引愈多餘塩愈廣其甚者餘塩夾帶較正塩則有三分之一塩商先賣餘塩希圖利己而正引之塩所售無幾則謂之滯銷此餘塩充斥有礙正引之病也官塩每一斤制錢三十五文而塩秤始則十四兩爲一斤近則十二兩爲一斤以泥水攪和實則不過六七兩百姓忍氣吞聲無如之

鐵嶺縣志

卷十九 藝文

三十

鐵嶺縣立第一工科印

何此泥塩短斤以病民也聞近山西州縣中惟鳳台縣知縣賴令到任即循定章官運官銷乾塩足秤不假商人之手百姓頌聲載道亦無私塩充斥情弊又署陽城縣知縣胡令因紳士呈控塩商短斤泥塩出賣深爲民害並查明領運正塩有夾帶餘塩等弊將塩商徐得璫懲責督令書差以乾塩足秤售賣每日銷塩不下萬斤闔屬感頌而額引于以暢銷所謂有治法尤貴有治人也夫巡緝私撫例有明文而各州縣之私塩仍是鹽場之官鹽奸商設計取巧妨礙正鹽匿課肥己其弊伊于胡底相應請旨飭下山西巡撫查照舊章仍歸官運官銷不准招商辦塩庶引鹽不致滯銷私鹽悉歸正課而官民亦不至交困

請飭永革陋習以重命案疏

鄧慶麟



臣風聞吉林地方遼闊村落星散四鄉每一出命案或距城數十里數百里地方官以路途窵遠不肯即驗必俟續有報案湊成三五起七八起時方帶領刑忤衆役百餘人挨次臨驗竟有伺候至三五月之久不獲相驗者一日官到上下廠規每一命案必須數千吊其公館供給看守呈報及鄉保額外洒派侵蝕尙皆不在此數實爲地方之大害且死屍日久暴骨或爲犬狼殘食或值暑熱靡爛屍驗不全每致屍親兇犯藉以狡執故相驗不實訟端不息易啓開檢之案殊非矜恤民命之道應請旨諭令吉林將軍嚴札各該廳嗣後遇有命案無論多寡遠近隨報隨驗不准任意遲延廠規名目永遠革除隨帶人役酌定額數不得逾定額之外違者揭參庶死屍無暴骨蒸檢之慘吏役鄉保亦無從藉

### 鐵嶺縣志

卷十九 藝文

三十一

鐵嶺縣立第一工科印

事勒派矣

### 范河洞重修慈覺寺碑記

魏燮均

佛教闡於中國漢唐以來好佛者愈多而建廟者遂遍天下矣於是山水之佳半歸佛土如九華五台普陀峨嵋及五岳四鎮西湖諸名勝指不勝屈即一邱一壑之間及有林蠻之美泉石可娛者無不闢荒谷爲道場爲緇徒羽流焚修之地蓋佛法本空而奉佛者宜於淨土故建廟於山水之間居多焉范河站之東二里許其山綿亘自東北來名曰三塔山山之巔有浮圖建於大遼天佑二年本朝道光辛卯圯於雨山勢南下伏爲平岡石闢爲洞深不可測名曰棲雲平岡之下沃壤連阡而范水左來橫流於右其南則群峰疊嶂列如屏風洵天造之幽區地闢



之佳境也洞上有古刹舊名爲千佛寺碑碣無存不詳始於何代考縣志爲遼常安縣故壤西爲雙城東爲鼻空之地皆咸平府所屬而塔建於遼寺或爲遼代所遺也迄今數百餘年兵燹迭遭人民非故而茲寺獨存無恙安知非佛法護持歷久不變者乎岡之下於國初建藥王神一楹東西禪室各二楹歲久漸形凋敝住持僧昌順懼其廢難爲舉也乃請於督會之善士者廣募而重修焉工興戊辰之春竣於明年之夏所費千餘金俱煥然而新之金碧莊嚴照耀岩谷矣工成乞余爲記並更其名曰慈覺蓋謂佛以慈悲覺寺也於是乎書同治己巳孟夏既望後三日新屯范河站山嘴子公立

農神廟碑

魏燮均

鐵嶺縣志

卷十九 藝文

三十二

鐵嶺縣立第一工科印

先神者教稼穡之神也有功於民則祀焉國家養民垂訓首重農業乃令守土者修其祀典歲時不輟所以教民知有本也祠之建也自雍正六年知鐵嶺縣事高公始乾隆十四年章公邦翼繼而修之又閱五十年嘉慶壬戌德公來令斯邑留心政事教民課耕因觀廟貌摧殘慨然思葺之于是捐廉庀材復其舊制昭其典也迨道光乙巳邑之武庠生王名成福者督理斯祠之會又爲募資購料宏其舊規增修山門廊舍各三間工未竟而王生逝焉未幾明府崇公奉檄斯土嘆其鳩工之未終欲以成王生之志是以繼修其缺遂告厥成迄今十餘年矣雖未傾圮漸形凋敝庠生香陔任君心焉傷之乃呈請於縣君賡公賡公曰先農者農事之原也不踵以修之何以重祠典遂與少府鮑公捐廉慨助



俾香陔督厥工焉嗚呼前人創之後人承之盛典相沿凡以重農事也今工竣矣緣舊無碑誌恐沒諸賢之善乃爲文敘其巔末勒諸片石以示來者云爾

龍首山慈清寺碑記

魏燮均

龍首邑之名山也自東南蜿蜒而來十數里左窺城闕右枕麟河昂然獨秀蟠踞乎東郭之郊蓋不獨爲一邑之觀瞻而亦一邑之保障也山之巔舊有慈清寺又名爲三清觀相傳建自唐代與浮屠並古迨宋元而後志乘闕文其事無徵焉迄有明萬曆間曾經修葺父老猶有傳者然已無碑可稽矣我朝龍興遼瀋恪奉佛法崇德八年賜銀敕修於是壯其殿宇整其廊垣金碧輝煌照耀巖谷較前代之莊嚴規模宏遠矣

鐵嶺縣志

卷十九 藝文

三十三

鐵嶺縣志第一

夫宇宙泉壑之區半歸佛土遂令山林增色雲霞一新其地稱名勝焉是山僻在銀州勝據一邑雖無周王謝公之跡然春夏之間游宦騷人觴咏畢集秋高氣清霜林變紫而載酒扶筇者尤相屬於道也孰謂巖徑蕭條探者尤爲浩歎哉余生長是邦寓懷邱壑覽山川之形勝得龍首之大觀丙申以來題咏益夥又嘗搜諸碑誌訪之傳聞而後知斯寺之創修有自來矣第年湮歲遠文獻無徵後之人即欲考其源罔識所據寧不重可慨耶友人香陔任君郡諸生也搜巖稽古與有同心丁巳秋偕登是山緬懷往蹟慨然思所以誌之住持僧山月清修梵行宏願夙深聞而樂之於是謀之吳君仲培商君文瀾王君肇周及姜紫垣王仙舫王曉峯諸君遂共議勒石以垂久遠且事之創始者難爲功而相



因者易爲力也蓋寺前舊有仆碑臥草間質完而字缺二百餘年矣使舍其材而不用不將終棄空山乎乃覓工剔其苔垢靡而刊之庶亦價廉而工省也余遂書其略以俟後之考者

邑之有景紀名勝也山川城野隨地呈奇晴雨晦明因時幻象蓋景不同而登臨攬勝者今昔何殊哉鐵邑舊有八景不知始於何代自有明之世已見詩章第邑乘載筆而不書是以都人士罕有知者勝蹟湮沒曷勝慨然茲持表而著之鐫諸碑陰俾後之騷人詞客遊目騁懷知所寓興亦未始非藝林之小助云爾

山郭朝煙

柴河晚渡

蓬渡風帆

帽峯雲樹

龍首尋秋

鴛湖泛月

白塔橫雲

紅崖積雪

鐵嶺縣志

卷十九 藝文

三十四

鐵嶺縣立第一工科印

重修節孝祠碑記

商廣源

國家褒揚鉅典節孝與忠孝並重顧忠多男子節孝惟婦人以婦人資秉愚柔未必皆嫻閨訓曉詩書而一時柏舟矢志茹蘖飲冰或強暴之遭猝櫻兇刃或痛夫溘逝刻即捐生其一種貞正剛烈之氣有非教育所及勸導所迫者殆較諸男子爲尤難此朝廷激揚之典有請必准無格於部議者也本邑薰阜門裏捕廳西側舊建節孝祠向係官爲經理歷有年所風雨摧殘漸就傾欹邑侯福君慨然有興修之志爰偕同司鐸崑圃劉君少尉晉卿楊君首先倡捐又以需費尙鉅遂約城中旗民紳士等勸募量力出貲以成盛舉即諏吉興工諸君以國家有旌獎之典地方不可不崇坊表之觀易門而坊誠偉觀也於祠旁建大仙堂一



間仍舊貫而擴充之以及四圍墻垣皆整齊堅固從茲冰霜勵節彤廷  
隆旌表之恩巾幗流芳鐵嶺展馨香之敬美輪奐美奐底厦常新以妥以  
侑神靈有託豈不懿歟是爲記

文廟尊經閣重修續碑文

周 暉

國家興學立校下逮郡邑皆崇建廟貌以祀我

先師孔子而例必捐修者所以俾該處之僚案士庶得以申其莫不尊  
親之意也惟是斯文日盛廟宜常新傾圯則當改作殘缺則當增修改  
作之用繁增修之役數度非出入是門者繼承樂善不倦而殿廡門墻  
何能肅觀瞻於弗替哉歲己巳副尹兼學憲奏請武英殿書籍頒行學  
署奉旨准奏隨諭州縣建閣以貯之而我鐵邑文廟適當不可不重修

鐵嶺縣志

卷十九 藝文

三十五

鐵嶺縣立第一工科印

之日也曾蒙縣尊札父台酌派拔貢生尤世英歲貢生周文煥從九職  
梁國安太學生魏從寬劉文煜趙天錫劉瑜等會同旗署廣集捐項鳩  
工庀材而宮墻一切工程暨城角魁樓皆得與尊經閣一事修迄費計  
五千餘金捐貲未齊執事分行補欠焉是以至今十餘年而碑闕如故  
也夫瓦屋之患莫大乎滲漏既有其端而因而循之勢必至於木朽墻  
頽改作之難前車可鑒也儒學孫師台灼見及此爰擇及門之能事者  
爲修葺之役有文庠生郭文寶胡桂聲趙國璽吳自有等奉師命申勸  
捐項興工之日皆以歲試故延歲貢生周時代董其事先爲揭瓦繼爲  
塗丹舉向之所修營者依然維新快何如之費祇千金有奇工歲建碑  
屬暉爲文以記之謂前後之捐金者夥矣不標其名恐無以爲將來勸



况向之宗師縣主今之司教者一切美意何不可傳爲將來勸乎兩次  
執事紳士曠日持久率作興事不標題焉又何以爲來者勸且前以費  
繁而無力傳今以貲餘而代爲傳淳厚之意蔚起之休亦以見吾鄉之  
大可風也爰不揣謏陋並志之爲題名冠云

補修浮屠記

吳 枏

慈清寺前有浮屠九級創自何時無所考說者謂塔筆凌雲關邑中文  
運焉其理之信誣烏足辯但山川風景半賴人工龍首有塔以點綴之  
不嫌寂寞矣惜風摧雨剝塔基漸毀北隅及東南隅尤甚樵童牧豎相  
與空其中可容數人坐塔固依然卓立也而傾頽之患宜預防焉余思  
集衆力弭其缺謀諸朋儕僉曰可於是督工備料子亨魏君香陔任君  
均任其勞工既竣余謂同事諸君曰我輩以補葺之術欲全偉麗之觀  
每有笑爲好事者然願力所能必斤斤以拘謹自守否者以外務置之  
余恐不好事者而或多廢事也塔其小焉者耳鄙見與諸君略同爰序  
其事質諸四方之登覽者

建修鐵嶺考棚記

廉 隅

鐵嶺俗尚詩書家多世族人才稱極盛焉而惟考試則無棚殊不足以  
昭慎重余於乙亥春重蒞茲邑公餘之暇與邑人士時相接見於是有  
捐修之請詢悉前令楊君倡其議而未竟其功並存有捐項爲數無多  
亦不敷支用余既身應民社凡有益地方之事且文教攸關能不爲之  
悉心籌劃耶爰囑紳董協力勸捐並約集同城僚屬各捐資以爲之倡



經始於五月初一日至七月朔而大工以畢墻垣鞏固堂構聿新號舍整齊關防嚴密從此應試者得以極行文之樂事而鼓舞振興人傑地靈不益見文運之蒸蒸日上哉所有捐資姓名合行勒石以垂永久夫創修匪易經久尤難將來勤修葺而善綢繆董事者不可辭其務守土者亦不得辭其責實有望於後來之君子矣是爲記

育英義塾記

常國輔

鐵嶺乃蕞爾之區二百年來甲科不絕豈地之鍾毓獨靈蓋亦撫育斯民者以詩書敦俗使然也邑侯陳公任於斯邑德政著焉而於文教爲尤崇故於書院振興後知課讀於家塾者因以日多獨義學爲之缺於斯乃創舉之俾寒微皆得以肄業則士習之蒸蒸日上可想矣惟經費

鐵嶺縣志

卷十九 藝文

三十七

鐵嶺縣立第一乙科印

維艱殊難遽辦今於祖越寺中籌計而成之者由公查香火地案餘資與其爭訟不休毋寧允辦公益於是歲撥錢捌百緡以爲修繕之費而尤恐廢弛在遠與延宗師首復捐廉率邑人以相助也乃書其額曰育英君子三樂之思隱焉寓矣尤擇邑紳於其間董之且以十二人爲弟子額特爲經久計也蓋非學術甚深其用心何精到如斯乎由茲以往後賴靡窮我輩自當力以維持庶乎公之德常存即邑之幸亦甚矣彼所謂培養人才之說惟公有焉於此不書所作將公創爲斯舉之意漸以湮鬱得無愧乎况後之徵文考義者亦爲憾故志之塾中條規十二則皆公之所釐訂謹列如左以共遵行焉

重修郝公祠記

曾憲文



癸亥六月余與趙君炳如王君顯廷及學界諸同人重修郝公祠祠前舊有房十二間重新建築之薄租租與勸學所以爲維持公益計落成同人囑余作文以記之凡舉一事籌款維艱此番工作費款萬餘金皆出自銀岡學會也銀岡學會係余與劉君敬瑚趙君炳如陳君秉初諸同人創辦學堂之初知學務擴充官款未可恃而銀岡學會即連帶組織之邀集本邑士紳學界同志各出私囊前後十餘年捐助而成得基金金及不動產約十五萬元與宗旨補助學款之不足及辦理地方一切公益事但事無憑藉建設甚難所以成此義舉者飲水思源實郝公復陽先生遺留學田累年積蓄餘資作之基礎故命名銀岡因郝公講學銀岡以示不忘祖之意夫古人作事祇求心之所安初不料身後之名及身後之益

### 鐵嶺縣志

卷十九 藝文

三十八

鐵嶺縣立第一工科印

郝公去今近三百年其遺澤孔長修其身後之祠且惠及學界如此其鉅想當日或亦意料所不及世事無常此後之遷流興廢盛衰又豈人所能思議耶然曹守蕭法先後同揆邦人士熱心公益數十年或數百年銀岡學會屹然常存實力經營積小高大定有以勝於今日也是以爲記竊有望於後之管理此事者銀岡學會正會長曾憲文撰文銀岡學會副會長趙方嘏書丹民國十二年七月立

### 水災記

海城 鄭沛淪 浚宣

宣統辛亥之歲春雪載塗農耕甚晚夏初繼以亢旱田禾初生半多黃萎五六月間雨澤饒足有禾麥油油之景象農民豫慶有秋不意積陰



不晴陽曦罕曜間二三日傾盆之勢輒大作山泉暴注陂塘水平至閏  
月中旬而荒歉成矣鐵邑近接龍首山嘗登其巔而東望則柴河奔流  
原田皆成澤國西則遼水汪洋極目數十里不能盡帆船近抵鐵路而  
人家之壁斷垣頽不可俛指數嗚呼近年以來無此巨災也久矣越數  
日各鄉以水災來告者日有所聞蓋以禾木未堅被澇之田雨過日出  
積水如沸湯不特秀實無期即薪蒸亦無取且聞遼中盤山牛莊營口  
各地水患較鐵尤巨人民有其魚之嘆其何以堪嗟乎吾奉無備荒之  
政習爲常事溝渠不治隄防不修耕者貪近利旱則與水爭田澇則終  
歲生涯盡付於波臣龍子且徼天之幸素乏蓋藏不知耕九餘三之計  
官若吏愒然置之吾儕號爲儒生旦夕研求多古聖治平之道曾亦不  
能出一謀爲救荒之所採拯吾民於昏墊稍有人心能勿對此而悽然  
乎昔孔子作春秋凡蝗螟水旱無年則必書所以敬天變憫人窮也茲  
濡筆而記蓋亦有餘痛已



詩集

山郭朝煙

詠鐵嶺八景共八首

明大學士 陳

循

依山附郭居一片朝煙合人家辨不真蒼茫見孤塔

柴河晚渡

柴河水清淺縈帶蒼煙下夕陽喚無舟晚渡看車馬

蓬渡風帆

往來渡口船風利乃得騁遙遙數片帆吹沒遠天影

帽峰雲樹

帽峯多白雲雲雜帽峯樹雲深山更深誰識仙源路

龍首尋秋

鐵嶺縣志

卷十九 詩集

一

鐵嶺縣立第一工科印

霜林變丹紅秋高天氣迥幽人植杖來踏徧碧峯頂

鴛湖泛月

湖上橫秋煙鴛鴦時出沒中有盪舟人高歌弄明月

白塔橫雲

山雨過城頭雨晴雲未散忽看白塔尖鑽入青天半

紅崖積雪

崩崖潰殷紅積雪留殘白夕陽山背來寒光照赤壁

醉題銀州酒家

郝 浴

已放中秋好月回重陽未到菊花開今宵不買銀州醉枉向黃龍荷鍾

來



其二

酒肆燒燈殘月生霜天白雁入雲橫如鸞總悟稽中散命駕終愁阮步

其三

可能數墨老餘年末路茫茫那著鞭遮莫安豐憔悴極支牀飲酒蓼花

刈韭

郝浴

草閣風簾今早晨雨聲驚醒灌園人綠翮畦韭滋蘭畹自起承筐餉四

鄰  
銀州葛米美甲天下熟為粥甘可忘肉園有蠶數本未重陽前紫

鐵嶺縣志

卷十九 詩集

二

鐵嶺縣立第一工科印

蕊婆婆偏豔於日高熟粥之時懶人持粥而玩之清甜之趣未易  
為吾徒舉似也

郝浴

瓢  
葛米流脂玉液漂東籬紫豔自妖嬈浪傳茶賞強如酒獨有痴人飯一

送剩人入千山

郝浴

欣聞鳴鳥司鐘鼓更有赤烏豔海棠人臥千山花氣裏月升三島水晶  
旁

贈剩人

郝浴

雲開窈窕桃花洞雪落霏霏洗耳泉我正不辭千日酒君來莫帶一分  
禪



近重陽

郝浴

旭色寒生燕不巢  
炊煙和露濕花稍  
三朝又是重陽節  
依舊青山滿四郊

銀州有菊重陽大放是日攤書滿床然徒用忘憂非真有古人益智之美也蹉跎入夜已就枕矣忽念良時好境屢成拋擲因起燒

鐙賦之

郝浴

衝籬紫豔落寒香  
白晝攤書夜撫床  
終恨今朝愁裏過  
起燒紅燭送重陽

囑雁

郝浴

霜打蘆花雁起群  
銀州徹曉萬聲聞  
玉關雖隔陽終在  
莫亂長行下玉

鐵嶺縣志

卷十九 詩集

三

鐵嶺縣立第一工科印

雲

春日雜興

郝浴

落日孤吟野水邊  
暮雲千里故鄉連  
一聲何處黃昏磬  
海上今宵月又圓

圓

其二

郝浴

青山一望白雲遮  
道是烏桓帝子家  
不度春風出紫塞  
空和明月剪梨花

花

元夕銀州草堂讌集

上元雨雪過酒家  
獨酌取醉夜闌踏雪歸  
益無聊念同謫都物  
化矣天外孤踪復來舊  
雨後一日招聚草堂聞歌  
酌月因事書



懷

郝浴

銀州雪汎廣寒宮燈前隻影醉搖紅月中之人今已矣零落霓裳在眼  
中曉來獨漉牀頭酒不覺如蘭之臭同茅檐擁篲分山翠一鳥嚶鳴百  
鳥聰升堂尙憶三投刺再誰世知此土逢瓦牀密結跣趺坐鰓花帶雪  
沃蘭葱几中六葉宣窰器上傳宣德元年字不圖酌酒清如空一炤鬚  
眉皆墮地當爐斯養尾已賴勦勦蝟縮不知名忽引洞簫吹白雪鸚鵡  
之舌鸞鳳聲梅花夜發青天外楊柳春風紫塞盈迢迢玉漏明河轉心  
飛滿座舊公卿回首青雲墜窈窕呼吸素位還灑掃半世虛名襟帶開  
千秋眉骨今始出三復上古聖人書一拜當今聖人賜聖人天上卿雲  
歌謫官雪裏舞芰荷起看蟾影空雲路滴瀝當頭手可摩恒山西照三  
鐵嶺縣志

卷十九 詩集

四

鐵嶺縣立第一工科印

千里直下有水名滹沱十五十六燈滿河年年火樹吾家多今宵舍弟  
魚龍戲應慰高堂念阿歌

銀岡行

郝浴

豈不愛一廬簾捲秋山讀父書豈不愛一堂生階玉樹看兒行豈不愛  
一官押班螭頭紫綬繁豈不愛一林朋從魚鳥散幽襟豈不愛一壺豔  
燒紅蠟譜笙竽豈不愛一牀雲鬢曉立溫柔鄉自從束髮親燈火弱冠  
登朝遂作狂俯身東戍黃龍下紅顏綠鬢盡滄桑二十餘年寢不寐天  
涯回首月如霜雖恨百憂淪瘦骨猶喜心開書一囊洛下眞儒宗孟子  
翰墨直聞泗水香晨登講席歌堯舜千山翠色落銀岡可知天道終歸  
正從此丹山起鳳凰



銀州獨坐一喜一悲

郝浴

今歲銀州市常聞蒿里歌漫勞傷道殣應與慰羅羅紙貴楮錢短囊羞  
米價多不須仍買藥誰爲起沈疴

其二

漠漠南山雨因風入敞園到窗聞灑落遶樹失騰鶩雙燕窺簾語青雲  
向客翻四天疑接地坐聽海濤喧

暮春過酒罇取醉

郝浴

癸丑季春廿九同秦維紫左宏甫酌酒銀州之市醉歸草閣忽  
憶剩人在日愚與陳心簡夜宿奉天普濟院看月吟詩至四更  
不寐是年乙未鉅今十九年矣時寺僧厭其惡聲聞羣犬夜吠

鐵嶺縣志

卷十九 詩集

五

鐵嶺縣立第一工科印

皆唾爲狂比剩公順世心簡以人言怒我不得復有昔日之歡  
乃此夜得陶然與二子相對薊門之嘯山陽之哭於此兼之矣  
無復韓公子鱸頭倚二豪團圓如手足落拓自風騷入夏山花晚當杯  
夜語高尙疑燈影外髣髴落霜毫

其二

灑灑從吾好悠悠寄此身顛狂或拜石薄劣敢投綸鳥散花樓寂塵飛  
海市新杞憂三萬里何許問迷津

其三

一自吟風後源源說剩人酒籌侵世界屋角掛星辰燭剪銀州夜荷搖  
鷺水濱故鄉應此是何必憶鱸蕪



其四

漢沛今遼左神州再有年循良京縣滿雨露帝王偏玉陛崇三事龍荒  
受一塵深維鑿坏意終恐負前賢

其五

中宵厄酒罷簪筆晤詩書澹泊教兒子從容挽鹿車葛山閒作想堯里  
會如初親見盧陵老歸田喜荷鋤

祖越寺值雨

郝浴

松聲量萬壑秀色簇成雲滴瀝空山翠礪礪旭氣曛煙霞侵杖履鐘磬  
入氤氳十載名山興千金此見聞

其二

鐵嶺縣志

卷十九 詩集

六

鐵嶺縣立第一工科印

憑檻遙看處雨闌山益眞新紅嬌綺樹老翠束龍鱗萬里重關隔千峯  
此日親可憐杯度影攜著過江人

輔國東園

郝浴

帝子讀書處春風百草香高明比閱世奧博自升堂舊里森松柏平原  
下鳳凰善多心益樂俯仰見陶唐

南塔寺葵花

郝浴

濃鬆秋色自西來十道金繩界不開遶徑葵花黃燦爛分明烏出化人  
臺

其二

翠擎衛足仙人掌金布鵝黃帝子花莫憚霜飛常五月今番生在聖人



家

其三

種到銀州世界分黃裳不改舊衣紋但教阿練飛龍女不用瑤池散彩雲

其四

旭色平銷金氣乾闌珊尚與露花團依稀似聽如來笑花裏來尋五佛冠

其五

芽萬此離葉作枝金風不動出疎籬化城高掛三秋日正是葵花欲放時

鐵嶺縣志

卷十九 詩集

七

鐵嶺縣立第一工科印

鐵嶺城四首

郝浴

百尺空城首自搔青山綠水一週遭烏翻東北遼天盡魚上西南海路高龍氣已衝都護印雞聲還亂大夫騷幾回欲雪滄桑涕愧似新亭泛濁醪

其二

故李將軍此用兵帑金十萬鑄嚴城曾矜雲鳥兼山立不謂繚垣一掌平風雨愁歌花樹曲黃昏爭泛木魚聲銷魂更是狻猊石兀守空衙傍月明

其三

甲第排雲久作塵重開茅屋見陽春峨眉漫寫蓮花步廣柳終迷漁父



津竟入他山樵古木輕於舊水捉金鱗悠悠芻狗還成夢杖履春風想  
聖人

其四

敕放歸田八十翁中華宰相起遼東名留古寺豐碑上事在前朝天順  
中多寶環收千疊翠羣朝返照一般紅玉門此日應如闕滿路春風攬  
轡同

贈清峯寺僧遊五台回

剩人

曾向金剛窟裏回芒鞋盡帶劫餘灰王侯共備香花供龍象爭傳衣鉢  
來自有模形留積雪仍將消息問春梅從今擊破琉璃盞滿目青山即  
五臺

鐵嶺縣志

卷十九 詩集

八

鐵嶺縣立第一工科印

元霄作

董國祥

雲靜三階月欲高滿城歌鼓競遊遨儼然柝弛金吾夜不復烽傳介馬  
勞壤擊眞堪稱帝里原田庶得美車旄衰遲獨未忘奇士閉戶燃藜自  
熟騷

郊郝復陽放言體

董國祥

人情縱復似陰諧也逐東風佛面開胥糜等閒能肖夢還看海日射金  
臺

盛京紀述

董國祥

六鼇神足奠坤輿草昧天開壯帝居禹貢山川指顧裏周官禮樂繪圖  
初千秋王氣維磐石五色卿雲捧日居誰識東京作賦者徘徊已是十



年餘

東山仙洞

董國祥

窈窕窮巖岫，豁訔啓洞門。法幢纏曉氣，梵響出雲根。寺轉欵平路，煙披遠近村。捫崖辨題句，剝落半苔痕。

送李宮詹賜環

毘陵吳達

驪駒初唱嶺雲秋，典屬還家尙黑頭。濟上青山雙淚洒，關門明月一仙舟。他年射獵知無罪，此日行藏任自由。漠漠水田飛白鷺，羊裘老子更何求。

李寧遠看花樓

東牟左聵生

花下提戈月滿樓，將軍控馬待高秋。雲山一望寒旌色，遼水於今日夜

鐵嶺縣志

卷十九 詩集

九

鐵嶺縣立第一工科印

流

中秋偕諸友集郝復陽先生月台

左聵生

肯將佳節負心期，籬下寒花欲滿枝。陶令徑開頻載酒，謝公墩掃共裁詩。一年月到團圓候，萬里人當少壯時。好與良朋拚一酒，風塵有弟隔

天涯

萬花樓

東牟左聵生

雕欄翠幃注天涯，休沐材官唱晚衙。朔氣忽隨陰雨變，危樓常傍夕陽斜。夜明露泣平原第，秋老籬開處士家。盛事不堪搖落盡，猶存消息問

梅花

泛舟鴛鴦湖

左聵生



青春葳蕤碧草芳冰開湖水泛鴛鴦黯黯春流波上下羈縶與之俱短  
長同人載酒向湖畔更放鷁舟遊汗漫棹發參差菱荇分人語低昂鳧  
鴨亂洪濤出沒巨流通扇舟明滅夕陽東萬頃茫茫光靈霽千山倒影  
氣鴻濛傍舟大魚有時出驚波跳聲舟沸澤鱸鮪風雲久不興蛟龍咫尺  
愁相失座上久客蘆中人迴船悄然動呻吟不知楊柳西園盛爭如  
芙蓉南浦深南浦芙蓉風歷亂酒酣興極淚如霰空餘鷗鷺對浮沈湖  
上鴛鴦終不見

次左錫侯范莊

豫章戴國士

地僻海天東雙流夾萬松洪荒藏太古曠莽接長空樵獵漫山火氈裘  
入骨風誰憐絲粟命尚在一坏中

鐵嶺縣志

卷十九 詩集

十

鐵嶺縣立第一工科印

觀音洞詩二首爲環生年台賦

陳行恭

物外惟邢子能消去國憂短筇隨道路絕塞得林丘涓滴塞泉響陰森  
古洞幽天高思縱騎與爾會同遊

其二

精舍從僧結丹經許客携山林安問虎雨雪自聞雞眼放三韓闊愁空  
二室低此間堪隱逸直與武陵齊

題觀音洞

方山陸鳴時

想見雲深處無能一快遊千峯圍瑞靄一徑別林丘石洞開天久名山  
古佛留展圖何所慕吾道自悠悠

早春望龍首山

鐵嶺知縣

胡藥嬰



東山常在郭春日眼新開雪積風光暗谿晴雲氣來乾坤匏自繫歲月  
鬢相催寥落空藜杖無心步石苔

觀音洞

胡藥嬰

山谷知誰鑿儼然成小堂雲涵蒼壁潤蘚覆古苔香淨遠龍蛇氣深通  
日月光穴空懸石髓斑駁盡文章

其二

洞口人煙渺空濛翠欲浮草春無鹿跡澗古有雲流晴日巖常暗鳴禽  
樹自幽桃花深谷發漁者未容求

鐵嶺塔

木齋 李呈祥

古塔十三級北城獨立幽八方隨佛日一柱起邊愁鈴鐸諸天語階梯

鐵嶺縣志

卷十九 詩集

十一

鐵嶺縣立第一工科印

象罔求無從登眺處俯仰自悠悠

歲暮書懷

李呈祥

萬事只求身健在逢人相慶太平時大家物力喧神鼓小市風光颭酒  
旗痛飲乍忘衣似鐵高歌那惜鬢成絲試看冬日生春日先上扶桑海  
樹枝

元日

李呈祥

三冬羈客又新年獨坐清宵思悄然地曠誰聞羣賴寂天高自數列星  
懸燈花結蕊臨詩卷雪粒凝香薦酒筵已解荷鋤耘半畝寒原早喜見  
晴煙

逢虎行

李呈祥



猛虎當路坐行人皆辟易爪牙靜不張眼光下照石恨無朱亥椎奮臂  
碎其額虎亦太恣睢故與人相阨徐行踏怒去但留虎蹄跡

讀麗中師自粵寄梅花詩

李呈祥

嶺南老衲欲逃禪撇寄梅花詩百篇萬里遙期明月下寸心共盡早春  
前美人入夢多遲暮孤客招魂半野煙無待笛聲吹徹處天山雪落已  
悽然

焦冥師壽日避客

李呈祥

凌虛羽士逐朝霞洞裏清猿待客茶應知天上春還早別向青山掃落  
花

李將軍看花樓

失名

鐵嶺縣志

卷十九 詩集

十二

鐵嶺縣立第一工科印

露泣百花明殘樓傍故城壁穿餘火色礎閣無雲生罩暗將軍樹荒傳  
君子營當年問絃管夜月走聽鼙

異石二絕

失名

吳宮糜鹿走西子尚凭欄不逐五湖去浣沙溪自寒

其二

失名

預知百卉盡寄影紫雲英天外無幽草梅花結古盟

題觀音洞

天台 周鼎

巉巖石洞倚天開碧水悠悠去復迴秀列千峰含曉霧寒生積雪鎖蒼  
苔風塵幾黯香爐色獅象遙瞻法座巍支遁幽期終不負雨花何事獨

登台



讀先太傅寧遠伯傳敬賦長律十四韻

先太傅諱成梁

李

錯鈔君

有漢推猿背前朝重虎臣  
繭絲寧作障執秩共其民  
半壁憑楮柱群陬失撫循  
蠻氛裁左戢羌事復西論  
雷火先聲疾乾坤血戰頻  
競傳邊立靖敢信策稱神  
維嬖疑誅賞論功屢屈伸  
直將成貝錦誰肯恤勞薪  
獻納更三相權衡賴一人  
廉頗容善飯新息偶全身  
異代山河改王家典籍新  
語方崇起翦名竟躡甘陳  
小子誠無賴窮年不自振  
匣中遺故劍每夜泣風塵

觀象臺二十四韻

有序

李

錯

聖祖御製其象限紀限二儀測術尤密前古無之於穆之懷與天爲一  
信乎肇跡顛蒙闢昭文象緯懸健行標幹運靈曜示蟬聯覆冒綱維集  
盈虛氣朔宣處高疑倚蓋居默等淪淵宿昔神明治儀型睿哲傳造機  
符動靜剖器敵方圓落下功初述鮮于治自專錯銀星度密注水地輪  
便

鐵嶺縣志

卷十九 詩集

十三

鐵嶺縣立第一工科印

聖智通幽眇天工絕後先  
雙樞交合契都柱直任權  
梁褒觚稜屬跗平  
締構堅石渠深轆輦簡平儀下有輦置石輪渠中候者升輦環視  
銅篆徑張弦地平儀張弦以測  
營隸橫簫側弧分  
紀限邊渺茫窺日馭毫髮析星躔  
歲月頌千禧乾坤藁一筵  
世難求髣髴誰是語蹄筌  
矗立青冥表憑凌沆瀣鮮  
山龍迴局曲雲海極雕攜  
六合環嘗綴三辰軌舊沿  
華林遺製薄文德巧思偏  
瞻眺成眞遇低徊得  
蹇延王蕃徒酌足虞喜謬  
安天弱莛暗宏響秋蠲感  
大年倘容恣寢伏

或擬著新編



經牧馬場

康熙辛丑進士 戴亨 通乾

龍堆千里道極目望茫茫草木窮寒麓風雲慘太荒地鄰箕子國居近  
管公鄉有客懷南土魂驚牧馬場

經胡家窩鋪

戴亨

險溺胡家堡行人莫不聞地頑常帶鹵山蠶不生雲草滑埋蛇穴風腥  
過虎羣往來經此地躑躅畏斜曛

郝公祠前臥碑二鐫郝大京兆林詩八首大京兆為郝復陽先生之子

甲午之奉天京兆尹途次感懷

中山郝林

幻身曾此落入人間六十年來認舊山

先君以甲午請奉天余生是年距今一甲子矣

摩頂憶常傳妙偈

先君盧余雖育請於剩人為摩頂受傷

垂髻痛已背慈顏

余五齡失恃

夢吞文果空魁榜

鐵嶺縣志

卷十九 詩集

十四

鐵嶺縣立第一工科印

先慈夢吞文官果而生余壬戌殿試已擬三名後仰置二甲

識兆金牌果賜環

余初生有持欵取牌二面送至家者莫知所自先祖為命乳名曰欵後先君環後竟如其識

其料帖瞻成

恨久天南塞北兩潛潛

先親廿載謫龍城華表歸來鶴淚清此日嚴關尋舊戍却啣新命尹陪

京題橋司馬心猶壯捧檄毛生淚欲傾獨幸銀岡遺址在重開講院見

墻羹

先君召環時留所居為銀岡書院載在附縣志

忝公符節撫留都霽色親承授睿謨法尚寬平綏舊俗治先禮教化邊

隅保厘責重慚前哲知遇恩深愧腐儒徧望雨膏皆赤子可能隨處慰

來蘇

豐沛曾聞歌大風興朝謨烈著遼東松亭古戍遺殘堞龍爪荒祠舊掛

弓地迥寒山留積雪天高明月響孤鴻行行注目雲深處報國承家在



此中

重脩銀岡書院落成拜祀恭記

郝林

遷客承恩返柏臺空餘故宅冷莓苔嚴親氣作山河壯慈母魂依子舍  
哀重整棖題成講院薄修蘋藻薦春醅荒堦拜罷空垂淚風木含悲首  
重回

龍沙廿載臥霜清天譴寧辭血淚迸長擬負薪成戍子何期持節到邊  
城一身絕塞分甘苦終古荒山隔死生今日之坏何處獻天空雲斷暮  
煙橫

兒時猶記侍庭除佔得寒檠午夜餘壁列諸儒勤覲面先君手書歷代聖賢及諸儒姓氏於壁晨夕瞻禮堂  
名格物細繙書先君白題致知格物之堂林間爵雪聞淒雁鋤下揮金種野蔬遺蹟久湮

鐵嶺縣志

卷十九 詩集

十五

鐵嶺縣立第一工科印

餘廟貌故人相見倍欷歔戴左諸公子弟皆昔年鄰居受業者相與執手流涕

直節當年久著聲儒宗此日定鄉評藜光上映文昌宿居人祀文昌於書院後野老爭

傳侍御名教澤遠貽開後學講堂新葺聚群英銀岡從此留千古龍首

山高柴水清

烈婦吟

魏燮均

烈婦汪氏漢軍楊明妻也于歸十五年伉儷綦篤翁姑早喪又無子  
女夫年三十四忽病不起旋卒氏哭幾死殆七日夜間仰藥以殉邑  
人嘉其節余賦詩以表彰之

男兒爲忠臣死不可奪志殺身以成仁浩氣塞天地女子爲烈婦從一  
誓不二夫死以身殉從容就大義賢哉楊明妻汪氏德無愧結褵十五



年恩情篤伉儷貧不厭糟糠貞吉主中饋方賦白頭吟忽灑青春淚誰  
知音調乖中道裂琴瑟良人病不起溘然謝塵世婦乃枕尸哭痛哭亦  
無濟上無舅姑存下無兒女累黃鵠歎孤飛失雄何所寄不如作鴛鴦  
生死心同契夫唱婦乃隨黃泉一路至世間未亡人以死爲難事寧守  
柏舟節不肯隨夫壻豈知死節難守節亦不易何如歌女貞效彼漆室  
息日昏月無光雲慘風惻厲比翼鳥哀號連理樹忽萎空房鬼影來幢  
幃燈下避烈婦乃含笑心喜郎魂至理髮整衣裳仰藥從之逝壯哉此  
一行世道人心繫

烈女篇

魏燮均

丙寅二月有馬賊數百人焚劫開原之下肥地殺戮極慘死者甚

鐵嶺縣志

卷十九 詩集

十六

鐵嶺縣立第一工科印

衆經官軍擊敗竄至鐵嶺東之房身陽掠一少女年可十六七賊  
暱其美欲污之女怒詈不止遂見殺既死賊復以藥灼其面棄之  
去遠近村鄰有失女者往尋其屍不可辨究不知爲誰家女也鄉  
人乃瘞於河側時奉旨設忠義局欲採其事上聞因不諳姓氏遂  
寢惜哉友人張枚齋明經現充採訪事語余余聞而烈之未忍聽  
其湮沒爲賦詩以表其節

青青女貞木錯節空山裏狂風摧其枝不墮濁流水窈窕小女郎不知  
出誰氏清潔本天性生長蓬蒿里破瓜正妙齡青蛾兼皓齒待字方有  
期蔦蘿松柏依丙寅春二月賊至狂如兇殺人血成渠縱火室皆燬刀  
光烈焰中忽覩傾城美掠之上馬去追兵慮後起挾竄房身陽虜騎暫



休止女恐狗盜污白壁玷有恥不屑宛轉啼甘誓馬前死厲聲反詈賊  
顏變桃花紫賊亦按劍怒殺之洩憤耳五體灼且薰玉顏慘成鬼鄰村  
尋女屍不復辨形似鄰人收殘骸乃瘞河之涘嗟哉烈女身危比履虎  
尾不避菹醢誅仿佛聶政姊能使阿堵羞又似李廋婢恨未掣佩刀斬  
首髮怒指嗚呼離亂時有女貞如此惜乎失姓名無由請旌旨採訪徒  
傍徨不敢達天子我爲歌一詩幽光發稗史庶幾慰貞魂流傳徧遐邇

遺懷四首

魏燮均

天地恐寂寞乃復生才人高厚不能言假人傳其真授以五色筆著手  
即成春日月吐光華川嶽發精神四時及萬物刻畫新與陳六合本平  
淡道破皆奇文使無才人筆混沌如未分茫茫數萬古誰洩精華醇可

鐵嶺縣志

卷十九 詩集

十七

鐵嶺縣立第一工科印

知天地意亦不甘湮淪天地求知已才人爲其倫胡遭造物忌坎珂常  
終身

終身困坎珂造物寓深意本非忌其才正欲成其器福厚名不歸福薄  
名乃至古來諸才人不盡生得志悠悠數千載至今稱不墜而彼庸碌  
流同時擁厚利終於無所成生死人皆棄乃知享厚福原爲天所忌固  
知享盛名正是天所賜天意報才人迥與尋常異若論及因果荒誕何  
足議勳如武鄉侯僅有栽桑田節如陶處士乞食無炊煙一出與一處  
品懷殊相懸豈無術致富而願窮益堅良以重其名不暇籌金錢乃有  
勳常存乃有節可傳可知名與利二者難兼全與爲利而死吾寧爲名  
焉



賢士與英雄古今傳不少不必以文章文章亦矯矯上以勳業隆下以書畫寶或者詩擅長或者詞爭巧皆不泥才人宜享令名好而我實碌碌寸長無所表雖有所著述未敢禍梨棗名不出閭里材亦類傭保壯歲已不聞四十行將老姓名傳不傳悠悠任大造

### 大火行

丁卯二月二十三日申時邑之東郭火災是日大風狂甚延燒居民一百二十八家房五百餘間風威火烈不能撲救徹夜火光燭天如燎原野至明日稍熄被災者已慘不可言矣聞父老云嘉慶十二年丁卯是日東郭亦被災其火與此相類噫異哉豈天數歟賦詩以紀其事

### 鐵嶺縣志

卷十九 詩集

十八

鐵嶺縣立第一工科印

銀州二月春風高塵沙蔽日喧驚濤樓頭鐘報火突起黑煙漠漠騰雲霄須臾烈焰不可制縱橫拉雜延相燒火星如箭亂飛射四鄰一片聲喧囂祝融空際作遊戲指揮風伯區別燎或燃華屋居萬瓦崩堂坳或越比鄰舍三椽餘編茅倉皇老翁踰墻走蹙蹙婦稚奪門逃衝煙冒死掠衣物兒襁女烏橫陳拋風威煽虐勢愈猛火光撲面同煎熬霎時破垣變赤壁頃刻畫棟成虹橋玉帛菽粟化灰燼鷄豚犬馬生燔炮仿佛楚人俗爲旱致雨燒龍蛟又如宋門災餘殃竟及池魚燹臺飛電阿房炬神邱燭遠炎山遙苦無郭憲含酒嘖能滅佛圖作雨傾盆澆又無江陵劉昆賢令尹叩頭向火登時消安得天河水倒瀉齊傾不用翻天瓢焚香竟有向天禱虔誠立格迴神颺長衢狹巷塞無路舉國奔救人



如潮幸賴戍兵資彈壓乞兒未逞賊心豪

時城中有大兵駐戍統領託師帶兵彈壓幸免搶掠

由申至亥尙未

熄燭龍噴耀明通宵嗟哉一百二十有八戶處堂燕雀無居巢我聞道  
旁老叟說往經丁卯天譴遭是日狂風亦暴厲東郭片土皆成焦迄今  
日月六十載又看焚蕩龍山椒嗚呼豈真天數不可追禍福端自由人  
招人心利慾熾如火安知震怒干天曹前年妖氛破城日烽燧夜照城  
之濠居民膽落亂奔竄流離幸免屠賊刀彼蒼示警有天意人胡不悟  
天心昭今復慘罹此浩劫天陰神鬼爲呼號君不見二更雞唱報妖異  
城頭夜夜聞啼鴉

弔金萬涵先生墓

魏燮均

山色青如舊先生去不回朝廷隆世胄豐鎬出人才展墓芟秋草抄碑

鐵嶺縣志

卷十九 詩集

十九

鐵嶺縣立第一工科印

剔古苔我來且憑弔松柏尙餘哀

鐵嶺失守紀事

魏燮均

十二月初四日申刻降賊抵城徑入縣署見官詐稱借餉官許  
之既而去令其黨扼守東門復入署劫獄縱犯焚燬科房搶掠  
商賈城中大亂官吏皆逃居民夜竄殆盡明日商民輸金賊乃  
去

賊騎斬關入公然到訟堂官驚皆鼠竄牢破已亡羊街黑人無語城空  
火有光居民已逃散昏夜棄家鄉

范河城月夜散步

魏燮均

月色懸清夜千家一片秋屋隨崩岸斷水繞廢城流燈火疎籬院鐘聲



破寺樓有誰河上望懷古動閑愁

書院暮秋

魏燮均

秋色滿庭宇軒窗淨點埃樹根風落葉石縫雨生苔階冷斷蛩語天高  
聞雁來故人時過訪閒徑總常開

夏日與蕉園游帽峰

魏燮均

盤山下層磴薜蘿青拂衣谷雲迎客起野鳥見人飛寺僻徑雙引樹深  
山四圍忽聞清磬響知是近禪扉

懿路道中早行

魏燮均

不待雞聲唱征車即展輪雪光寒在地月色冷隨人漸近故鄉路尙嗟  
游子身家人掩閨臥未識客途辛

鐵嶺縣志

卷十九 詩集

二十

鐵嶺縣立第一工科印

龍首雜詠

魏燮均

山僧高閣眠山鳥喧林側曉起徧開窗坐看溪山色  
樓閣半藏見山城在有無空濛山煙裏一幅米家圖  
夕煙起遠山斜日下層閣昏黃微月生鐘聲動城郭  
夜寂松籟微山空人語絕清磬兩三聲佛燈半明滅  
門前秋色高牆外雲峰疊新霜昨夜來滿山看紅葉  
凜烈北風晴凍鴉飛不起山徑悄無人萬峰寒雪裏

懿路北山古寺

魏燮均

一帶岡陵北郭橫神祠獨在石樓傾殘碑細認前朝字遺老猶傳古地  
名牆外雲山餘落照窗中煙火見孤城洞深自昔無人問且祝慈航救



衆生觀音閣下有古洞

銀岡書院懷古

歲貢生石玉山明人

有客騎驄銀州走按轡搖鞭頻回首見有古祠氣輝煌下馬長揖問老叟老叟相對笑宛然我為略詳末與顛其年順治為甲午先生力諫遭播遷郝姓浴名字雪海謫居此地十八載情殷授受叩則鳴文風至此發光彩前院種蔬後種花竹籬茅舍除繁華理談今古同賽酒事論興亡常對茶雨餘策杖看山光隱隱蟄龍屋後藏雖則鐵嶺控其臂究之鼻租出銀岡銀岡之名自此始人曰伏龍臥而已胡然杏蕊兆西開綉綸顯命迎星使先生行矣弟子憂繫車維馬難遮留譬如甘棠愛南國譬如膏黍謳西周譬如邵杜後先政之善父母相稱難謀面癡立惆悵

鐵嶺縣志

卷十九 詩集

二十一

鐵嶺縣立第一工科印

奈何天因晦行蹤存書院誰知星換歲屢更茅蒼石砌產榛荆夢通壁聖牀皆土雪臥蕉窗月不明幸有京兆來致祭一見荒蕪泣出涕重修縣令宋與焦翬飛鳥革成新第此惟愚魯所見聞無而為有非敢云客聽謝別匆匆去回首銀岡護紫雲嗟呼中山記孟子解紫陽斷章銀州語錄嘔心血後賢未能興孰與同高節後賢即能興芳型終難滅臣盡忠心子昭孝節縱使嵩陽嶽麓石鼓白鹿出其前地靈要必殊人傑君不見院內爐烟高石碣

看花樓

張鶴賡

弔古名園踐綠苔將軍死去廢樓頽當年花草都零落空牘蒼蒼石上梅



冬日銀岡書院送李獄生先生歸里

張鶴賡

先生定歸計十月理征鞍故里關山遠前途風雲寒琴裝奴僕少車馬  
客行單且喜梅花發怡情一路看

其二

丈夫志千里岐路何足嘆惟有師生契翻教離別難論文山月上贈策  
夕陽殘叨領栽培力深情結寸丹

庚子八月朔聞警

房寶舉

禾稼縱橫積滿田逃人相見但潛然右丞詩句今堪詠萬戶驚心生野  
煙

辛丑亂後豐年有感

房寶舉

鐵嶺縣志

卷十九 詩集

二十二

鐵嶺縣立第一工科印

小隱林泉志未酬農家况味幾勾留禾經雨潤重生耳樹被風吹半禿  
頭滿地穗餘欣雀鼠漫山草實飽羊牛豐年幸入維魚夢樂利聲中報  
有秋

辛丑九月助辦保甲由前網戶屯至宗荒地豐盛堡路上作

房寶舉

策馬搖鞭數里行荒郊尙觸好詩情閒潭水靜雲流影空谷風號樹有  
聲晚節黃花秋圃老夕陽紅葉遠山晴田家父老欣相話又得安居見  
太平

山城子

吳鳳藻

徑曲草根吞山城舊迹存清流環壙野紅葉隱孤村極目傷兵火驚心



問故園何須漁父訪此地即桃源

寄吳五樓

田葆綬

驪歌一唱幾星霜千里邊關阻且長不盡離懷悵雲樹况經浩劫感滄桑尋山白傅精神健捧檄毛生歲月忙每憶追隨詩酒地最關情處是銀岡

其二

傀儡登場一腐儒功名常悔負吾廬人情自古心如面花樣翻新紫奪朱過寡未能慚用猛貞雖不字敢辭迂雙魚遺我欽明訓別緒茫茫感慨俱

古柏吟

羅葆恒

鐵嶺縣志

卷十九 詩集

二十三

鐵嶺縣立第一工科印

古柏吟古柏愈老何森森當春不爭花柳豔經冬不畏雪霜侵祇爲託根古巖下山深徑曲無人尋世人爭言樹李桃祇因桃李易成陰豈知易成易搖落何如古柏有赤心不作尋常用留與明堂作梁棟乃知蒼蒼造物意爲老其材置此地桃李莫笑柏莫悲遲早遭逢各有時君不見漢朝武帝聯吟處至今傳誦柏梁詩又不見錦官城外有古柏馨香常伴武侯祠

五人墓弔古

倪信臣 全五

此墓亦千古壯哉正氣伸風雷發義憤松柏有精神黨錮成冤獄英雄出子民清明誰麥飯草色自芳春

游成都城北武侯廟感懷

彭熙臣



漢家古廟叢孤鬼巴蜀遺黎慨雁鴻自古才難稱俊傑而今世不見英雄國扶異族羞王猛民被深仁比召公莫論文經兼武緯襟懷澹泊幾人同

與述堂登太平寨西山洞

楊祖榮振先

巖巖千仞壁直上手攀蘿遊客山腰怖歸鴻眼底過晚山紅在樹秋水碧無波羨煞林棲叟煙霞歲月多

蒙荒途中

楊祖榮

大造均陶鑄緣何此地偏平沙無片石百里見孤煙客夢車爲榻胡風馬不羈行行茅店宿晚飯雜腥羶

過古北口

鐵嶺縣志

卷十九 詩集

二十四

鐵嶺縣立第一工科印

咫尺天門不易攀單車九轉翠微間萬山突兀渾無地一線交通險扼山落日尙留秦故壘諸藩遙拱漢雄關清時共享承平福煮酒烹茶守吏間

其二

一旅當關敵萬兵巖巖虎口衛神京金遼過客如泡幻名利催人出塞行山市晚煙懸畫稿野營落日咽笳聲十年歷盡風濤險不畏崎嶇又遠征

蒙荒途中作

王恩溥

黃沙漠漠路迢迢秋盡胡天草木凋野戍霜高人跡少長途風緊馬蹄驕驚心景物他鄉異回首關山故國遙日暮烟消何處宿數聲羌笛旅



魂銷

遼源早發

王恩溥

遼源北去路漫漫客思鄉愁緒百端茅店鷄聲邊月冷長空雁叫塞雲寒驚心風鶴途多梗滿眼星霜夜未闌浩浩平沙杳無際晨風凜冽覺衣單

紀事

吳璋

蝸角蠻爭觸亦爭妖氛十丈落平營逢楊尙道留秦戍涿易何年返宋城塙上連鷄栖不並空中兩鼠死相撐中原戰伐無衰歇獨眺南雲憶漢旌

其二

鐵嶺縣志

卷十九 詩集

二十五

鐵嶺縣立第一工科印

大連灣口鬪艦長白山前動鼓枹豈謂臨邊五都護不遮入塞兩單于長江飲馬哀鳴角臥榻容人痛剝膚儒服儒冠牛天下解紛深愧魯連徒

春日野眺

辛丑年作

吳璋

和風吹百草已綠門前山遠步眺晴郊黃沙浩漫漫炊煙起破屋日午鷄聲喧漸喜鄉村中生人多往還馬牛劫既盡耒耜缺以殘廢隴久無穢何方給晨餐虎狼滋吞噬死者如邱山苟免為天倖焉能謀歲寒乾坤莽蕭瑟小邑矧彈丸翹首望八極惻然摧心肝

丁未九月與友人登龍首山

曾憲文

紅葉蕭蕭萬樹霜陰晴天氣過重陽秋來頓覺山河瘦老去翻飛歲月



忙四壁松風新酒國半廊花木舊僧房青錢買醉無賓主引得閒雲笑客狂

其二

故國風光分外真座中朋輩弟兄親幾班名士成塵夢萬古秋山作主人佳節不爭春富貴好花偏愛菊丰神開樽莫管滄桑事落得登高自在身

其三

莽莽塵寰入望收鄉心低壓古城頭山形不改千年色酒力能銷萬種愁地溷華洋誰是主風吹草木自成秋由來大造無常局贏得新詩紀勝遊

鐵嶺縣志

卷十九 詩集

二十六

鐵嶺縣立第一工科印

庚子避亂貓崖村

曾憲文

暮秋連日雨僻處覺悽然窗破衣爲紙簷低溜似泉冷雲含雪意溼葉釀厨煙樂事尋何處圍爐笑語旋

庚子由貓崖村回城渡柴水

曾憲文

驚心探虎口柴水渡淙淙匹馬愁中影秋山劫後容城空餘落日野靜泣寒蛩回首歸來路悽雲暗幾重

歸家兵火後八月暮秋天問路心常怯逢人涕在先河山無淨土城郭自寒烟向晚憑高望愁懷獨悵然

丙午春查學楊士屯途中作

曾憲文

一天涼氣重車馬北風吹地僻逢人少山高見日遲村墟經劫後學校



起衰時竊比輶軒使馳驅敢憚疲

鐵嶺失守雜詠

有序

共四首擇錄其二餘見浮生夢跡

曾憲文

辛亥除夕前一日賊假革命軍入城邑宰高華亭警察所長趙聯芳出走城中無主民心騷然焚掠幾將不免壬子元旦余與彭君拙青范君重山陳君秉初董君斗垣出與交涉賊首戴秀山圍之於縣署客廳白刃手槍幾死於亂夜與劉君敬瑚尚君子揚微行赴省謁總督趙公次珊求援初四日圍解夜半余始至家雙親涕泣妻子悲啼初賊之來也隔斷交通人傳余已死作此誌感且以誌幸

怯兵不戰作旁觀鼙鼓聲中逼歲殘革命旗來皆是賊衛民城破已無

鐵嶺縣志

卷十九 詩集

二十七

鐵嶺縣立第一工科印

官驚心動魄人如病慘霧愁雲夜自寒蹈海仲連拚一死誰知舌口解圍難

一霎危機起劫塵游魚真是釜中身腥羶滿地獅狂吼叱咤驚天虎作嗔街巷蕭條存數友庭闈闐寂泣雙親既無官守緣何事簞食迎師爲

弔民

越三日奉軍至賊去邑人迎奉軍於城南

國慶歌

民國元年十月十日

鄭沛淪

中華古國肇造五千年 民爲炎黃胄 化開歐美前 聖賢踵起  
德藝流傳 五季以後 遺風蕩然 偉人出長江干 掃除專制  
張民權 高舉五色旗 厚集衆師團 血戰漢陽市 氣吞武勝關  
大哉共和 無忘革命紀元



拳禍行 有序

趙方 嘏炳如

清光緒二十六年義和拳肇禍詠鐵嶺事實以誌之

國運將終妖孽生義和神團鬧北京青燈紅燈眾弟子高呼滅洋助大

清清后清王 時慈禧太后訓政端王戴權權信神拳 寵不疑恨不即時逐四夷煌煌大誥頌通省

羣情洶洶尊法師

鐵嶺新屯民首義八農田間輟鍾起 八人田間鋤田忽然作法進城 公堂驚悍索刀兵犬血塗

面收獄裏 縣令楊昌瀚字海琴不信殺其小黑犬以血塗其面收獄以禁之

明府四言禁妖邪頓使城鄉謠諺止盛京敕令來群妖黃巾纏頭紅繫

腰 六月初十日早法師率徒衆由盛京而來 先燒耶穌後天主指詈縣尹足舞跳 因入人故怨之喧罵職官並揮刀研之幸有旗官博海峰護救乃免

夜燒鐵道煙漲橫放炸擊鼓助威風懸燈上香滿街叫披髮仗劍繞城

鐵嶺縣志

卷十九 詩集

二十八

鐵嶺縣立第一工科印

行羣情鼎沸喊燒殺俄兵十八北逃生財物任人羣攫取 火車站存有洋貨任人攫取有洋銀四十餘箱博

禦收 一時官民慶太平 雖賢者亦道從此洋人弗來也

西關武廟立法壇基督教徒受摧殘勒取財物啓十字 苛罰教徒並在頭上刀取十字未領喜者爲望友亦曰白眼圈

並啓 殃及良善脅制官 旗民地方官拜見法師均行跪拜禮

七月七日禁煙火大小各戶俱冷餐越月功令遍勦捕 七月北京通令各省勦滅之 四郊煙

熄民始安

聯軍入京帝西巡俄犯黑龍怒目瞋妖魔惹禍良善受驅民如羊填黑

津 俄人驅僑民入黑河不下千萬

殺人如麻傳塞北官民相顧均失色居民四散苦逃生 城中商民均逃之四鄉 官亦渡

遼遠避匿 縣令孟憲率隊赴城西獅子嶺開放封獄城中搶掠大亂 鋪商財物搶掠空四鄉黎庶半是賊慘淡門



巷居無人可憐貓犬都無食

流離之後遭兵劫四鄉均被逃兵搶掠暮秋之初人漸歸畏敵如同畏猛虎家家戶戶

謹閉扉劍履有聲怖兒啼婦女愁對語亦微夜觀東關糧棧火紅似朝

霞辨却非

俄人很毒用白役稍通俄語為之服役者曰白役又曰通事要草要糧擾鄉民榮令曉峯創立支應局邀

人襄辦護鄉民

支應局紳董十二人管支應商號十五家管出納紳董劉東煥楊

毓松金如礪彭錫庚韓文麟彭虎臣張希孔曾憲文倪信臣楊祖

榮吳瓊趙方嘏

三班輪值首有我每班紳四人商五人糧草一日萬萬索可憐新歲不容過元日催到

鐵嶺縣志

卷十九 詩集

二十九

鐵嶺縣立第一工科印

東方白

山東無賴學俄語為虎作倀人民欺辦得秧歌索厚賞娶得媳婦索厚

儀白役隨官列平等官亦稱白役曰先生新令接篆即不依知縣陳璋接任即將通事取銷北京和約俄斂跡

白役從此勢亦微

自詠

商人 王 榮

早把名場置罔聞青蚨過手若浮雲無親每愛人能孝有弟偏於我不

羣瓜饑未綿桐半老茶香初熟酒微醺年年頓覺平生夢幾度回思意

念紛

夢楊振先

王 榮

夢君邀我上烏桓楊君時為熱河平縣知事迢遞山河跋涉難枕上片時數千里醒來還



憶路漫漫

冬夜懷亡友楊振先

王榮

幼無父母壯無家奔走天涯度歲華枕上青寒窗外雪眼前明月夢中  
花我心自信堅如鐵世道何堪薄似紗幾向東山弔楊意殘楊啼盡數  
生鴉

詠懷

王榮

不慕浮華不好名閑同樵牧話生平久拋書卷心猶憾快飲醇醪性未  
更三沐三薰驚俗眼一生一死見交情每從毒霧妖氛裏貫倚危樓望  
帝京

鐵嶺縣志

卷十九 詩集

三十

鐵嶺縣立第一工科印